

關中勝蹟圖志

關中勝蹟圖志卷十三

兵部侍郎兼都察院右副都御史陝西巡撫畢沅纂

古蹟

宮闕

同州府漢登仙宮在韓城縣東北水經注徐水南逕漢武帝登仙宮東

魏萬壽殿北史魏文帝本紀大統八年十二月行幸華州起萬壽殿于沙苑北

後周天成宮通志西魏太師宇文泰故居泰以同州扼關河之要既專政猶時居州後孝閔帝受魏禪改同州宮宣帝大象二年改天成宮

長春宮玉海在同州朝邑縣本周武帝作保定五年宇文護築隋開皇中修之元和郡縣志大業十三年高祖起義兵自太原舍于此武德二年于此置陝東大行臺太宗居藩作鎮唐書高祖本紀高祖起義兵九月次長春宮蘇頲幸新豐及同州敕宜以今月二十五日幸長春宮謹案杜甫詩所謂天晴宮柳暗長春即此今縣西北一里有東西長春二堡是其故址

隋金城宮唐書地理志華陰三十里有隋金城宮

普德宮唐書地理志華州鄭縣東北三里有普德宮謹案元和

志鄭縣又有太華宮大業二年置四年廢唐咸亨二年更名神臺宮

華陰宮唐書地理志華陰縣西十八里有隋華陰宮唐顯

慶三年更名瓊嶽宮

唐興德宮元和郡縣志在馮翊縣南義旗將趨京師軍次於忠武園因置亭子名興德宮

古蹟

苑園第宅附

魏沙苑監元和郡縣志周太祖與高歡戰於沙苑大破之於戰處立忠武寺今以其處宜六畜置監

隋廣通倉在華州通志隋文帝以長安倉廩尙虛詔以西至蒲陝東至衛汴水次十三州募丁運米於華州置廣通倉以給長安

永豐倉元和郡縣志在華陰縣東三十五里渭河口隋置

義寧元年因倉又置監

唐折衝府在蒲城縣通志唐建府有五曰相原孝德溫泉宣化懷仁按相原今之賢相鄉又有崇德鄉卽孝德善德鄉卽宣化懷仁鄉卽懷仁諸府所由名也

伏龍府在澄城縣南五十里通志唐置兵之所太宗時太原王榮爲伏龍府折衝

古蹟

祠宇

漢華嶽廟在華陰縣東五里漢書地理志華陰縣太華山在南有祠集靈宮武帝起

謹案集靈宮今桓譚仙賦序華之靈臺觀址也

山下有集靈宮漢武帝欲懷集仙者故名殿爲存仙門爲

望仙山海經西經之首自錢來之山至於華山華山冢也
其祠之禮太牢踰山神也祠之用燭齋百日以百義瘞用
百瑜湯其酒百尊罌以百珪百璧晉書禮志魏元帝咸熙
元年行幸長安使使者以璧幣禮祀華山魏書禮志文成
皇帝卽位三年正月遣有司詣華嶽脩廟立碑數十人在
山上聞虛空中若有音聲聲中稱萬歲云又泰常七年正
月遣使以太牢祭華嶽太延元年立廟置侍祀九十人歲
時祈禱水旱春秋遣官率刺史祭以牲牢有玉幣孝文帝
紀太和二十一年五月癸卯遣使祭華嶽册府元龜梁太
平二年八月車駕西征次於陝命宰臣杜曉祭華嶽廟並

禱隋書禮儀志大業十年祀華嶽築場於廟側唐書高祖紀武德二年十月甲子祀華山三年四月丙申祀華山冊府元龜睿宗先天二年八月癸丑封華嶽神爲金天王開元八年三月令太常長官祭華嶽舊唐書玄宗紀開元十二年十一月庚申幸東都至華陰上製嶽廟碑勒之於後唐會要玄宗幸東都至華州令刺史徐知仁與信安王禕勒石於華嶽祠南之通衢上親製文十三年七月七日碑成張於應天門以示百寮冊府元龜開元二十五年十月戊申勅御史大夫李適之祭西嶽天寶三載四月丙辰令宗正卿濮陽郡王徽祭西嶽八載九月命宗正卿褒郡信

王璆祭西嶽九載正月文武百僚禮部尙書崔翹等累上表請封西嶽刻石紀榮號帝固拒不許玉海建隆二年八月修西嶽廟宋史禮志開寶六年立秋日祀西嶽廟於華州眞宗祥符四年祀汾陰車駕至潼關遣官祀西嶽用太牢備三獻禮庚午親謁華陰西嶽廟羣臣陪位廟垣內外列黃麾仗遣官奠廟內諸神加號嶽神爲順聖金天王五月乙未加上西嶽曰金天順聖帝春明退朝錄祥符四年車駕次華陰上見嶽神數里迎謁上召問老巫阿馬婆對如上所見上加敬禮詔封爲金天王上仍自書製碑文以寵異之碑高五十餘尺闊丈餘厚四五尺天下碑莫及也

其餘刻扈從太子王公以下百官名氏製作壯麗巧無倫
比元史祭祀志至元三年定歲祀嶽鎮之制七月土王日
祀華山於華州界二十八年春二月加上西嶽金天大利
順聖帝華嶽廟碑明洪武三年詔依古制止以山水本名
稱西嶽華山之神王維正西嶽廟記西嶽廟圯嘉靖己亥
陝西巡撫聞其事天子曰新之潼關兵備副使何鰲受檄
任事於是闕宮穹閣峨闕修廊窅窅燿燿奕奕堂堂視嶽
比雄而埒麗矣續文獻通考隆慶二年六月陝西地震命
撫臣張祉告祭西嶽華山之神通志本朝順治八年遣禮
部尙書王鐸致祭康熙元年遣左都御史楊時薦致祭三

十二年因秦省亢旱復遣致祭四十二年聖祖仁皇帝翠
華西巡御題露凝仙掌四字額恭懸嶽頂金天宮內廟中
建石碑一座恭勒奎文四十四年御書重修西嶽廟碑五
十六年遣內閣學士查弼納致祭雍正元年遣內閣學士
田文鏡致祭御製重修西嶽華山廟碑記太華之以望秩
尊於列嶽也自虞代而已然矣商周以降祀
典迭修而建置祠宇實始於漢自是而後代有葺治云我
皇祖聖祖仁皇帝康熙四十二年冬翠華西蒞展謁靈祠
稽典報功特新廟貌迄今又七十餘載矣歲丁酉撫臣畢
沅以修葺請且稱籌項興工無煩會計予曰嶽廟歲久繕
治固宜而謂無動經費則不可廟制宏麗方望所崇靈應
尤盛且爲秦地重鎮我國家實憑賴焉其出司農金經理
之於體制維允爰發內帑十有二萬命疆吏督視興修自
殿庭廊廡觀闕門序旅楹寢成繚垣陞城頽者翼之漶者
飭之崇閎岌業孔碩有閑丹牖塗既翬飛鳥革蓋飭材鳩
工者兩年於茲而後西嶽之諸宇煥然一改其舊觀工竣

以勒文紀事請朕惟天以春生萬物以秋成萬物西者四時利成之方也故曰說言乎兌惟茲華嶽峻極於天於行爲金於卦爲澤乘圓靈之肅氣司蓐收之化光明星宅其巔大河貫其麓殊祥奇蹟不可殫舉故能吐納風雲甄育萬品以佑我全陝井野桑麻順成豐阜蓋藏人無疵癘靈貺洊至報祀聿皇則所以繼前緒妥神靈祝民庥者其在斯乎國家荷天之寵百靈護祐往者平定西陲犁準夷之庭掃回部之穴流沙數萬里外烏孫大宛之域天方默克之區販章耕牧悉主悉臣車徒馱載使傳絡繹往來乎其間道里孔長旣安且吉惟神力是庇昔張說撰嶽碑云華山踞中土西偏唐時疆域不出十道故以秦隴爲最西以今日計之華陰且爲西極之東道矣夫幅員擴則奠安宜切憑式厚則享祀益隆際茲海寓乂安民人和樂邊堠寧謐戎索恢張懷柔百神肅恭禋祀新廟奕奕肸蠁豐融則神之默相垂釐敷佐利濟以惠我西土者固億萬載永永靈長之慶也夫乾隆四十四年歲次己亥夏四月吉日御筆臣畢沅恭錄漢西嶽華山廟碑周禮職方河南山鎮曰華謂之西嶽春秋傳曰山嶽則配天乾坤定位山澤通氣雲行雨施旣成萬物易之義也祀典曰日月星辰所昭印也地理山川所生殖也功加於民祀以報之禮記曰天子

祭天地及山川歲徧焉自三五迭興其奉山川或在天子或在諸侯是以唐虞疇咨四嶽五歲一巡狩皆以四時之中月各省其方親至其山柴祭燔燎夏商則未聞所損益周監於二代十有二歲王巡狩殷國亦有事於方嶽祀以圭璧樂奏六歌高祖初興改秦淫祀太宗承循各詔有司其山川在諸侯者以時祠之孝武皇帝修封禪之禮思登假之道巡省五嶽禋祀豐備故立宮其下宮曰集靈宮殿曰存仙殿門曰望仙門中宗之世重使使者持節祀焉歲一禱而三祠後不承前至於亡新寢用邱墟迄今垣趾營兆猶存建武之元事舉其中禮從其省但使二千石以歲時往祠其有風旱禱請祈求靡不報應自是以來百有餘年有事西巡輒過亭祭然其所立碑石刻紀時事文字磨滅莫能存識延熹四年七月甲子宏農太守安國亭侯汝南袁逢掌華嶽之主位應古制修廢起頓閱其若茲深達和民事神之義精通誠至約祭之福乃案經傳所載原本所由銘勒斯石垂之於後其辭曰巖巖西嶽峻極穹蒼奄有河朔遂荒華陽觸石興雲雨我農桑資糧品物亦相瑤光崇冠二州古曰雍梁馮於豳岐文武克昌天子展義巡狩省方玉帛之贄禮與岱元六樂之變舞以致康在漢中葉建設宇堂山嶽之守是秩是望侯惟安國兼命斯章尊

循靈基肅共壇場明德惟馨神歆其芳過禳凶扎拏斂吉祥歲有其年民說無疆樊毅修西嶽廟碑山經曰泰華之山削成四方其高五千仞廣十里周禮職方氏華謂之西嶽祭視三公者以能興雲雨產萬物通精氣有益於人則祀之故帝舜受堯歷數親自巡省設五鼎之奠柴燎煙埋致敬神祇艾用昭明百穀繁殖黎民時雍鳥獸率舞鳳皇來儀暨夏殷周未之有改也其德休明則有正祥荒淫臊濊篤災必降秦違其典璧遺鄗池二世以亡高祖應運禮遵陶唐祭則獲福弈世克昌亡新滔淫鬼神不享建武之初彗掃頑凶更率舊章敢用玄牲牲牲必充天惟醇祐萬國以康光和二年有漢元舅五侯之胄謝陽之孫曰樊府君諱毅字仲德承考讓國家於河南究職州郡辟公府除防東長中都令誅強競撫瘠民二鄙以清命守斯邦威隆秋霜恩踰冬日景化旣宣猶復夕惕惟寵祿之報順民之則孟冬十月齋祀西嶽以傳舍窄狹不足處尊卑廟舍舊牆屋傾亞蓋世室不修春秋作譏特部行事荀斑與縣令先讜以漸補治設中外館圖珍奇畫怪獸嶽瀆之精所出正秀役不干時而功已著暫勞久逸神永有憑自古泰山邴邑尤存五嶽同尊哀此勤民獨不賴福乃上復十里內工商農賦克厭帝心嘉瑞仍畚風雨應時籤潤品物君舉

必書况乃盛德惠及神人可無述焉於是功曹郭敏主簿
魏襲戶曹史許禮等遂刊元石銘勒鴻勛垂曜含靈永有
昭識其辭曰兩儀剖判清濁始分陽凝成山陰積爲川泰
氣摧否洪波汜臻堯命伯禹決江開汶川靈旣定恩覆兆
民乃列祀典辨於羣神因瀆祭地嶽以配天世主遵循永
享歷年赤銳煌煌受茲介福京夏密清殊俗賓服令問不
違可謂至德德音孔昭實惟我后出自中興大漢之舅本
枝繁昌延慶長久俾守西嶽達奉神禮改傳飾廟靈則有
濟降瑞畚祚景風凱悌惟風及雨成我黍稷穡民用章康
艾室宇刊銘紀頌克配梁甫西嶽華山亭碑惟光和元年
歲在戊午名曰咸池季冬己巳宏農太守河南樊府君諱
毅字仲德下車之初恭肅神祀西嶽至尊詔書奉祠躬親
自往省從勞謙卽事有漸散齋華亭齋室逼窄郡縣官屬
灑灑無處尊卑錯總精誠不固畏天之威逢斯瘁怒時雨
不興甘澍弗布念存黔首懼闕曠素于是與令巴郡胞忍
先讜公謀圖議繕改斷度擗廓立室異處左右趣之莫不
競慕二年正月己卯興就旣成有元休嘉啓霽各得竭情
福祿是顧刻茲碑號吏卒俠路其辭曰巖巖西嶽五鎮次
宗緒德之尊大華優隆皇帝永思祀典孔明高神宵宴珪
璧贊通赫赫在上以畜萬邦惟嶽降神實生羣公卿士百

辟纘業攸蒙帝命不違歲事報功后辟命卿散齋外亭敬
恭明祀以奉皇靈處所逼窄屑罕有聲神樂其靜翛翬無
形尊卑有序絜心致誠因繕舊室整頓端平在其板屋孰
不加精天神同道萬祚是迎既受帝祉延丐後生爲龍爲
光顯又王庭爲公爲侯福祿來成刻石紀號永亨利貞周
西嶽華山神廟碑易不云乎天險不可升地險山川邱陵
險之時義大矣哉惟華山者虞書爾雅謂之西嶽周官則
爲豫州之鎮下枕周秦之交上應東井之宿俯臨汾射咫尺
荆梁盤紆巖薛刻削崢嶸干雲漢而孤秀屬江河而峻
時巨靈疏鑿亢高掌于巖端削成壁立流黃河于峴曲左
分底柱見朝夕之揚波右綴終南眺連山之無極顯神藏
用蘊智含靈鼓以雲雷潤以風雨信羣帝之所休憩衆神
之所躋蠻芝駕自此不歸霓裳於焉屢拂豈止績羽爲衣
葺荷成蓋化同毛女客類園公每挹仙人之漿時停酒母
之騎坐石口而穿陷乘白鹿以遊嬉寥寂忽恍往而不返
者也至如芳年華月零歛雲開谷包得一河經千里聳翠
嶠於紫微挺高峯於天漢蹇駐羲和之馭能挂姮娥之驂
積醴成池洪激巒岫聚卉爲髮萑葦生焉庭鱸夜萃必歸
伯起之堂苦霧晨興非獨公超之市若迺柴類方明之壇
望仙集靈之觀休牛散馬之地反壁祖龍之辭有祈必感

無請不遂保乂我金方裁成我三海振素祇以統億兆肅
秋節以慰蒼生國荷其慶民賴其福前代曾創祠宇兼植
柏樹歷年茲多榱崩禿樹亦往往殘缺太祖文皇帝固天
攸縱誕膺符命道邁三分功超九合將欲寧一區寓納之
仁壽而餘霽尚梗燕趙未并治戎河上走圖廓口每以講
閱之暇口履陰晉眷言舊所良用依然以大統七年歲在
旃蒙乃謁諸天子命將軍儀同三司西兗州大中正華山
郡守城陽縣開國公恆農楊子昕經始締構別更列植青
松二千餘根堂廟顯敞房廊肅穆芬哉薜席赫矣神居桂
酒徐斟清歌緩節無復霑濡之事豈有顛沛之容暨水德
告終蒼精肇運獄訟知歸人神胥悅帝負辰君臨宸居馭
朽執玉帛以朝萬國叩金繩而享百靈叡知之所牢籠英
威之所彈壓日月之所昭普舟車之所被通莫不乘毳駕
風梯山航海重譯屈膝請吏勤王大師冢宰晉國公任屬
阿衡惟親曰顛弼諧六樂緝熙五禮廢興聿修羣望咸秩
光贊皇猷式康帝載俾有七百之祚長扇於無疆天和二
年歲次大淵獻月旋沽洗詔史臣頌曰攸攸太極巖巖削
成混元既判載濁浮清含仁配厚蘊智爲靈功遂勿處日
用無名在秋戒肅居金作鎮巖霜比威膏液等潤容而不
有施而非益窮地之險極天之峻川澤通氣山藪藏疾靈

嶽峨峨清干旒旒隈積冬霰峯留夏日雷霆以之風雲自
出殷憂啓聖多難開基大人利見或躍俟時袞冕赤舄三
牡龍旗鼓腹行樂擊壤而熙神教以道民化唯德沈漸以
剛高明柔克文軌叶同皇猷允塞如山之壽寧我邦國唐
玄宗西嶽太華山碑天有四序星辰辨其分地有五方山
嶽鎮其域陰陽交暢則品物形矣精氣相射則神明著矣
西嶽太華山者當少陰用事萬物生華故曰華山踞中土
西偏七宮正位是稱西嶽案圖以察削成而四方信焉立
表以算其高五千仞明焉石壁傑堅而雄竦衆山奔走而
傾附其氣肅其威振其行配金其辰直酉前對華陽之谷
後壓華陰之郡左抱桃林之塞右產藍田之玉諒少昊之
下都蓐收之別館者也軒帝遊焉以會衆神虞舜柴焉以
覲羣后爰自夏氏迄于隋室朝更五姓載歷三千祀典相
因舊章未改壇場廟宇何代不修一禱三祀無歲而缺所
以報生殖事靈神不有怠也故亦祚休明災淫慝未嘗爽
也皇天眷佑馨我烈祖奄有萬方逮于六葉郊天地望山
川精意必達四時告虔加視王秩進號金天若是何者抑
有由焉予小子之生也歲庚戌月仲秋膺少昊之盛德協
太華之本命故嘗寤寐靈嶽舛蠶神交玉帛未陳幽贊必
先意而啓椒醴雖薄景福果應期而集元感昭賽可一二

而道耶記云下有方士真人金鼎石室上有明星玉女仙
草瓊漿茅龍一去毛女千祀前代帝王多所僥覲朕學儀
文之道故靡斯人之徒憂在至道之不宏不憂富貴之無
永患在蒼生之不理不患年壽之若流以功施四海爲長
生以業傳百代爲不死焉羨置集靈之宮虛望非福立存
仙之殿妄思輕舉哉於戲維嶽配天尚弼予志予欲布大
政康兆人嶽翼予欲定禮樂諧神人嶽聽予思其維嶽降
神生此多士無俾申甫專美於嵩語酌古訓心通神景善
而不答誠而不應未之有也嶽其念哉十有二載孟冬之
月步自京邑幸於洛師停鑿廟下清眺仙掌雲拂石狀霓
裳可接風過松嶺仙駕如聞久勤報德之願未暇封崇之
禮遲迴刻石梗槩銘山萬姓瞻予言可復也銘曰巖巖太
華柱天直上青崖白谷仰見靈掌雄封峻削齒蒼森爽是
曰靈嶽衆山之長白帝西下黃河北來陰陽孕育精氣徘徊
遇聖呈瑞逢昏降災玉池神挹石室仙開海絕瀛洲天
遙元圃偉哉此鎮崢嶸中土鬼神乍遊風雲忽聚高標赫
日半壁飛雨自古王者巡方必至龍駕帝服封天禪地南
面會神西后在位待予治國安人然後徐思其事華嶽精
享昭應之碑夫神其止也虛其行也直是以感生焉夫祀
其事也大其馨也德是以福生焉維嶽有喬居兌曰華天

作峻極厥仞五千降靈集祉密趁上國故風雨時若必應
休明玉帛之享亦豐其報致天人之和者功莫大焉皇帝
以開元嗣極今八載也文德被武功成垂拱而天下理纘
服而庶邦正於戲聖之配天不逆災祥之數而務修其德
天之降福或彰譴告之符而終與其善是以成湯興而炎
漢邁周宣懼而頌聲作閒自日在奎雷始電迨夫畢春氣
達萌牙山川如焚密雲不雨千耦適野胥病於失時百寶
崇墉將空于成歲我皇畏昊天之恩憫烝人之艱自郊徂
宮靡神不舉乃分命舊相尚書許國公蘇頲以瑞祝之辭
旅於西嶽將以蒙嘉氣獲豐年公時膺保衡代修袞職克
承先正對揚王休天子以下難九人允歸同德公是用僉
諸人坐懋廣疇咨有文章有禮樂焉既享冢位乃司宗伯
實佐和邦敬赫明祀爰居爰處威儀孔將閱是亭廟有來
斯啓州命長史河東薛晉俾焉協事於外宗人相禮展器
執書告備於內肅雍萃止宵艾並作幣尊六號玉用兩珪
焚燎舉而禮容祇若昧爽交而神光有粲粵三月庚申陳
薦禮也公已事復命式遄其歸時厥翌日旋于闕下車麟
麟而響止履鏘鏘而聲入則已渰周四溟澍洽千里拜獻
繩坡天臨在歡嘉公克誠神用影響制書褒賧東帛有差
既禱而祠古之義也丘不與祭帝有茲焉乃申命秩宗寵

終厥事則有牲牲樂奏之備以昭配焉癸卯告賽如前禮
夫全易不測至妙也因變感情至教也六府三事大功也
四望六宗大禮也后王卿士如彼歲月其道不易時維康
哉蘇公乃言曰惟我后之德格於上下神哉其需今茲臣
人可無述乎於是重費以謀始因物以書伐倬彼金石載
刊其陰俾後之敬事者知景福之攸在其辭曰於鑠太華
降神西峙惟王荒之配天有祀雲雨成物馨香協祉明明
天子禱於衍陽肅肅蘇公王命是將克誠攸享離畢其滂
年之用康記事惟政非昵非暇禮崇其敬祠而報焉以永
終慶惟靈感和幽贊而生有豐者石刊之則貞蘇公作頌
孔碩其聲李商隱修華嶽廟頌夫華嶽者在西之宗鎮正
基周秦之墟仰蔭二井之曜協金德以主生含素靈而養
物其狀也則削成萬仞秀出雲漢芝草植於其庭醴泉流
於其下連帶岡阜跨抱原野谷之所潤則土為神區膏雨
所降則澤沾萬里斯乃風雲之所宮府物類之所歸藏異
精靈之至極窮山嶽之壯麗是以神明居其宅遊仙萃其
宇任世以來莫不崇之故配天之美載在虞書宗秩之禮
列於祭典大唐應期承天受命紹重基於萬世闡皇風於
五葉敬神炳靈祈之以信而神降之福衆祥並應致治太
平災害不作自非誠之所感孰能臻此開元元年九月戊

戎遣元舅侍中太宰征東大將軍遼西王遼西常英冠軍
將軍禮曹尚書河內公河內荀尚立節將軍安定侯直勤
侯尼須薦以三特建立殿廟造作碑闕庶使明神永安其
居夫有一善之行尚稱之於時立惠於物猶詠之於世况
至公配之於兩儀仁澤濟之於生民稽之於義容可己乎
遂命史臣爲之頌曰奔奔西嶽實曰華山基洞水府峻極
於天跨原抱阜苞谷懷川幽壑澄潤虛岫揚煙峭萼空籠
茂林重邃吐納風雲殖生萬類體靜兼仁惠有攸利神明
是居遊仙是庇巖以崇宗谷以虛受則天之高擬地之厚
澤潤無窮體實長久功配兩儀德均徽猷朝咨上宰建茲
靈宇正以準繩參以規矩材用不愆顯章有厚庶幾神居
永寧其所賈鍊西嶽廟詩老柏寒飈飈清祠晝寂寂開門
華山北嵐煙沉日夕國家崇明祀五嶽盡封冊念我西土
民報君金天籍惟神本直信以道微損益無乃惑聰明訛
言縱巫覡因循作風俗相與成浸溺疲病閭里氓錐刀往
來客我行歲云暮登殿拜瑤席奠酒澈明靈緒言多感激
鬱鬱展冠冕凜然森矛戟斑駁石色重陰沉香煙碧虹梁
無燕雀聖座鎮虺蜴唧唧似有聞依稀疑所覲髻年業文
翰弱冠薦長厄天命幾微茫神達徒悚惕今來遊上國幸
遇陶唐歷正直不吾欺願言從所適張籍華山廟詩金天

廟下西京道巫女紛紛去似煙手
把紙錢迎過客遺求恩福到神前

謹案廟制舊正殿六楹寢殿四楹前爲金天門再爲櫺
星門再爲五鳳樓樓前爲顥靈門殿後爲萬壽閣臣於
乾隆四十一年七月入覲面奉諭旨修建今正殿廓入
楹寢殿廓六楹萬壽閣前設碑樓一坐凡兩翼司房以
及穿堂配殿牌坊鐘樓鼓樓香亭碑亭石欄界牆等處
無不踵事增飾因于乾隆四十四年三月以工屆垂成
仰懇欽頒聯額及御製碑文具奏蒙硃批待得時發去
旋即接得御書嶽蓮靈澍四字及作廟自西京升歆在
昔侑神比東嶽鼎構維新聯額並御製重修嶽廟碑記

臣敬鑄貞珉用昭不朽兩朝聖蹟掩映後先銀榜煥穹
霄之彩麗燭雕甍奎章敷大地之文光增翠琰靈宇于
此生輝神庥于焉永奠矣臣不勝欣幸之至謹書端末
于此

蒼頡廟在白水縣黃龍山通志漢建

謹案漢時所立廟碑見在

宋龍光寺在大荔縣北四十里府志宋文帝元嘉五年建

明崇禎修

梁饒益寺在朝邑縣南十里新市鎮縣志創自蕭梁天監
間唐貞觀二年起十三層浮圖明初圯天順萬歷間繼修

謹案寺有偽齊趙抃藏春
塢記阜昌癸丑九月立

魏大統寺在大荔縣北二十五里通志西魏文帝建金明
昌五年修明天順六年重修

周忠武寺元和郡縣志周太祖破高歡于沙苑于戰處立
忠武寺

聖武寺在蒲城縣東北鄉通志保定四年建謹案寺內有
四面象銘石
刻見
在

隋金塔寺在府治東通志隋建宋開寶中修寺內有褚遂
良書聖教序碑謹案遂良碑乃龍朔二年從慈恩寺本重
刻者遂良顯慶二年卒不及龍朔時也

龍興寺在大荔縣西北通志隋開皇年建謹案宋有修寺
碑開寶八年立

治平寺在澄城縣東北四十里白家河村通志隋文帝避

暑宮明萬曆四年重修

迴鑾寺在澄城縣南四十里通志隋文帝避暑迴鑾駐蹕於此因名

唐九龍廟在大荔縣東南十餘里九龍泉通志唐乾寧中連帥李公塘建每歲二月有司以牲醴修祀曰扶龍頭居民以五月十八日報賽相傳元亞哥守州禱雨以女許神雨降而女卒遂塑像焉

東嶽行祠在朝邑縣西縣志唐貞觀元年建宋政和八年

敕賜崇祐觀

謹案政和八年敕今見存祠中

伏龍祠在府西北四十里括地志故老云漢穿渠得龍骨

其後立祠因以伏龍爲名通志唐建

渭源寺在大荔縣西南五十里通志唐開元年建明嘉靖三十六年修

司馬遷祠一在府城中一在府城東明一統志唐時建

金龍寺在朝邑縣西一里縣志唐貞觀元年建明宣德七年重修

韓山奕應侯廟在郃陽縣西一里通志唐太和四年工部尚書譚石寶建祀韓侯奕宋政和五年禮部侍郎王顯重修

光國寺在郃陽縣治西縣志唐貞觀三十八年建宋延祐

六年宣和二年屢修明弘治元年繼修

精進寺在澄城縣東門外通志唐肅宗建有浮圖九級本朝康熙二十三年修

肅宗寺在澄城縣西北二十五里縣志昩自唐肅宗時憲宗元和四年重修明弘治正德間兩次興修規模崇麗甲於一縣

雲臺觀在華陰縣南八里明一統志唐建有孟郊留題宋史禮志真宗神御之殿華州雲臺觀集仙殿張方平記雲臺觀在華陰山下真宗再幸至和元年修建集真殿通志後周武帝時有道士焦道廣獨居雲臺峯辟粒飧霞常有

三青鳥報未然之事武帝親詣山庭臨軒問道因于谷口

置雲臺觀徐元文朱子祠堂記唐宋之亂希夷先生實修

是觀而隱居焉縣志明隆慶年修本朝康熙五十七年復

修唐孟郊遊華山雲臺觀詩華嶽獨靈異草木恆新鮮山

明星館時韻女蘿弦敬茲不能寐焚柏吟道篇李白西嶽

雲臺觀歌送丹邱子西嶽崢嶸何壯哉黃河如絲天際來

黃河萬里觸山動盤渦轂轉秦地雷榮光休氣紛五采千

年一清聖人在巨靈咆哮擎兩山洪波噴箭射東海三峯

却立如欲摧翠崖丹谷高掌開白帝金精運元氣石作蓮

花雲作臺雲臺閣道連窈冥中有不死丹邱生明霞玉女

備灑掃麻姑搔背指爪輕我皇手把天地戶丹邱談天與

天語九重出入生光輝東求蓬萊復西歸玉漿倘惠故人

飲騎二茅韋上天飛宋韓琦雲臺觀詩仙掌峯前羽客家

玉虛宮殿倚雲霞最高頂上誰曾到得見蓮開七丈花

靈應夫人祠在蒲城縣西二十五里堯山通志唐咸通中

碑云靈應昭著一方行祠在東門內宋崇寧三年封敕曰
雨暘之期應答如響有司以聞在所旌異明天啓間入祀
典

玉仙觀在華州東十里集仙錄明星玉女者居華山服玉
漿白日升天祠前有五石白號曰玉女洗頭盆水色澄碧
雨不加溢旱不減耗內有玉石馬一匹李攀龍太華山記
玉仙殿卽明星玉女祠

仙臺觀在蒲城縣西二十里橋陵南長安志唐金仙玉真
二公主入道置此觀

甘露寺在華州南八里少華峯之西

唐張喬遊少華山甘露寺詩少華中峯寺

高秋衆景歸地連秦塞起河隔晉山微晚景蟬相應涼天
雁並飛殷勤記巖石祗恐再來稀鄭谷少華甘露寺詩石
門蘿徑與天隣雨檜風篁遠近聞飲澗鹿喧雙派水上樓
僧蹋一梯雲孤烟薄暮關城沒遠色初晴渭曲分長欲然
香來此宿北林
獲鶴舊同羣

宋靈應觀在朝邑縣西南三里通志宋大中祥符四年建
在紫陽山一名紫陽觀形如箕掌宮殿參差時稱名勝張

三豐曾憩息其中

謹案觀有元至元二十一年所鑄鐘

魏徵祠在澄城縣南門外明一統志徵封鄭國公賜莊田
于澄邑子孫世居焉立祠以祀縣志宋宣和間建祠于西
郊金承安三年改建于南門外元至正七年重修

戒香寺在邠陽縣百里社縣志宋建

謹案寺有紹聖元年四月沙門文才所書

公據

后土祠在韓城縣西南魏山縣志宋真宗祈嗣於此山下

有駕到坪蓋駐蹕之所

河瀆靈源王廟在韓城縣東五里東王村通志宋政和元

年因河清敕建

宋陳振河瀆廟頌惟此洪河自大觀以來變濁為清者略有三焉乾寧保平率以累

日惟二年冬見於同州韓城郃陽其袤百里其久彌月詔遣尚書臣張勣持祝往祭既抵其野訪故祠得破屋一區

風凌雨剝頽圯殆甚懼不足以尊顯靈德上副一人誠意故已事而還請新廟貌詔可其奏既賜幣券以經其用又

出大農之錢以助其不足鳩工飭材一不在民庀事于政和元年秋八月之壬寅落成于二年春正月之甲子凡為

屋之楹三十有四堂崇以延門巖以開有廡如掖有屏如植籩豆之設有位侍衛之列有所輪奐丹雘儼無不肅乃

賜靈源為號因命擇詞臣而記其事部使者猥以屬臣振臣振不敢以荒菲辭竊惟洪範之數兆于五行五行之證

原于五事嘗以傳記考之河千歲一清其應在人君壽考
天下治安今接歲三清應益昭著自非睿聖撫運溥博淵
泉通乎高深何以及此是宜有以鋪張闋休揚厲偉跡而
詔乎無窮也如臣鼉螿之陋顧安能識咸寧之太和而調
達之姑以區區之見述其萬一而預榮焉臣謹拜手稽首
而爲之頌曰皇帝臨御十有三年禮制樂作典章粲然道
德之妙格於皇天景星慶雲膏露醴泉諸福之物克臻其
全大觀之初濁河三清乾寧保平郤陽韓城有洪其澄有
光其榮詔遣臣勸報祭惟精乃新其宮靈源其名郡縣奔
走累月而成神歆其類旣安且寧皇帝有道山川受職珍
符來貺惟神之錫皇帝有道受福無疆神之聽之德音不
忘薄領臣報預榮釐事作爲詞詩垂千萬禩謹案陳振碑
王恣正書政和二年正月立杜光庭稱爲河瀆西
靈源王又有西海廣潤王廟亦在同州界無考

太史公祠在韓城縣南二十里通志宋靖康元年修尹陽

史公祠碑太史公爲記錄之宗表表而矜文辭者皆不能
出其囿吾得觀其書矣至於廟像冢藏之石吾弗得而見
之宣和七年秋予始官韓城尋遺訪古乃在少梁之南芝
川之西得太史公之遺像焉余咨嗟而致式之因低徊周

覽則棟宇其傾頽階阨其卑壞挺隧其荒蕪惟是享嘗缺
然不至予乃愀然發喟屬其耆老而告之曰司馬公文爲
百世之英而所居不能蔽風雨學爲繼述之源而所藏不
能去荆榛今洪河汨流漾乎前也中條崛起峙乎東也河
嶽深崇氣象雄渾公文實似之而冢廟卑庳如此其不稱
公之辭與學也甚矣尤不爲邦人之恥與予乃率芝川之
民擇其淑躋而好事者凡一楹一桷至于瓦甍門疏之用
悉以資之卽公墓爲五架四楹之室又爲複屋以崇之旣
宏旣完矣于是直榮光之奧覘禹鑿之山面汾陰之脍縱
望遐觀豈不快哉嗚呼惟公之文大肆于炎漢之間馳騁
于千世之前其力勳屢實幹造物欲舉而悉之吾所不敢
動吾喙觀其下葬於茲非洪河巨嶽實稱公之文也哉乃
作述事享神之歌俾邦人習之歲時以樂公之神其詞曰
公詞有如黃河流黃河吐溜崑崙崙邱上貫星躔經斗牛下
連地軸橫九州崩崖搏石轉狀流騰煙趾霧飛蛟虬爾來
宏放三千秋班沿范襲非公儔公鑿混沌開雙眸力敵造
化窮冥搜公祠慘淡連古坵薨摧瓦落風蕭颯我獨來兮
爲公愁新公祠兮去榛杞殼甚豐兮酒甚旨民彷彿兮公
燕喜韓之原兮山之趾雲亭亭兮河瀾瀾公之來兮歲豐
美雲爲車兮颿爲轡公之來兮福滂被雲滅沒兮風不留

公曷往兮俾我憂謹案宋有邵籲謁太史公祠記
元祐五年四月立尹陽文靖康元年立焦丙書

法王廟在韓城縣北三十里西莊通志神房姓名寅以宋

真宗夢中治疾顯敕封五嶽法王營宇繪像以崇典禮每

歲清明四方來祀者輻輳

長興萬壽寺在府城內府志宋建寺後有文殊閣謹案寺有大觀

元年七月爾朱權所撰文殊閣記並圖楊時中正書

玉泉觀在華陰縣南十里通志宋皇祐三年建初名玉泉

院內有山菴亭旁有洞陳搏遺像在焉謹案山菴亭建于石壁上其下有宋

游師雄題名字徑尺餘

金濟安侯廟在華州城東南隅即城隍廟也廟碑唐乾寧

三年李茂貞犯京師昭宗幸華州刺史韓建夜袖劍詣行

宮有神人厲聲叱之建倉皇出明日物色之迺華之城隍

神也明年車還京師改元光化封神爲濟安侯謹案碑以金大定一

十四年十月立張建文又有光化二年碑李巨川文柳懷素書

元神禹廟在韓城縣東北六十里元史世祖本紀至元二

年龍門禹廟成王鶚禹廟碑記禹門舊有神祠因兵而燬

道流善信鳩衆議工爲殿五楹兩廡間架各十有八寢殿

營其後別爲道院世祖素知善信卽位時召對及陞辭敕

賜宮曰建極殿曰明德閣曰臨思仍命大司農姚樞書額

詔鶚爲文以記

玉泉觀在澄城縣西北玉泉縣志觀爲和陽子栖真之所

其徒純靜大師王永謙所造也

謹案觀有潘汝劫碑延祐乙卯四月立

雷祥廟在白水縣東十五里大雷祥村潘懇修廟記祥能醫能陶所造磁器工絕人謂之雷公器祥生而正直歿而爲神昔人常見曳杖于阡陌間鬚眉如霜素冠花衣今廟其正像云縣志祥于元世常加勅封至元十二年并勅修

廟

謹案潘懇元至正時進士碑文見在廟中

明淨安寺在朝邑縣渭水濱縣志寺以元至元年沒于渭明正德間改建王林村東距縣三十里殿懸宋徽宗時鐘

謹案鐘崇寧四年十月鑄據鐘文則寺名淨安今通志及府縣志並作安靖者非

望仙觀在華陰縣故正里通志卽漢武望仙臺故址今爲望河觀明萬歷九年修

本朝金天宮在華陰縣華嶽南峯巔通志康熙癸未聖祖仁皇帝翠華西幸敕諭撫臣鄂海撥帑金修建恭懸御書露凝仙掌額于殿內

韓奕廟在韓城縣西北里許通志春秋祭祀

以下建置無考

鄭桓公祠在華州西關

蘇武廟在韓城縣西北五里通志春秋祭祀

郭子儀祠在華州東關

顏真卿祠在同州府城中通志真卿嘗爲此州刺史故郡

人立祠承祀

卷十三

...

...

...

...

...

...

...

...

...

...

關中勝蹟圖志卷十三終

關中勝蹟圖志卷十四

兵部侍郎兼都察院右副都御史陝西巡撫畢沅纂

古蹟 郊邑

上古女媧氏風陵在潼關城北黃河中水經注關之直北
隔河有層阜巍然獨秀孤峙河陽世謂之風陵戴延之所
謂風埴者也唐歷潼關口河潭上有樹數株雖水暴漲亦
不漂沒人號爲女媧基天寶十三年五月因大風吹失所
在乾元二年六月虢州刺史王晉光上言今月一日河上
側近忽聞雷風曉見墳湧出上有雙柳樹下有巨石各高
丈餘路史女媧氏其神居于栗席之野是謂風陵堆乾元

中刺史奏闕鄉墳天寶十三載天雨晦冥俄失所在至是河旁風雷夜聲黎明視之其墳湧出復夾兩柳樹肅宗命祝史祠焉乾德四年詔置守陵五戶春秋以少牢祀之

臣謹案山西平陽府志趙城東有媧皇陵山東兗州府志濟寧州東南亦有女媧氏陵唐陸長源媧皇墓辯謂古志相傳女媧墓在大河中水高與高水下亦下蓋神之所扶持乃自天寶十三載秋霖冲沒之後至今無跡始知聞說皆謬也然自魏酈道元稱述以來自是唐置祀典宋置守戶又若確鑿可據者所謂有其舉之莫敢廢歟又關中陵墓志謂係黃帝相風后墓

史皇氏倉頡墓在白水縣東北七十里皇覽倉頡冢在利

陽亭南高六尺路史史皇氏終葬衙之利鄉亭南謹案皇覽作利

陽亭此作利鄉考聞人牟準作衛覬碑言倉頡冢碑大篆書在左馮翊利陽亭疑作陽者爲是也丹鉛總

錄倉頡冢方輿勝覽有數處當以在關中馮翊者爲是

史官村在白水縣東北府志村卽利鄉亭也史記倉頡居

陽武葬衙之利鄉亭南卽此

周聖母太妣墓在郃陽縣夏陽村之東明一統志城內有

太妣墓水經注郃陽城南有漢水水南有文母廟

告平城在華陰縣敷水之西水經注敷水南出石山之敷

谷北逕告平城東耆舊所傳言武王伐紂告太平於此謹案

地形志敷西縣有高平城當卽此

臨晉關在朝邑縣東三十里黃河東岸竹書紀年魏襄王七年秦王來見於蒲坂關史記曹相國世家參以中尉從漢王出臨晉關正義在臨晉縣故言臨晉關漢書武帝本紀元封六年立蒲津關注師古曰卽臨晉關通鑑中大通三年魏大都督庫狄溫守封陵築城于蒲津西岸

謹案封陵卽風

唐書地理志蒲津關一名蒲坂關柳宗元館驛使記自

華而北界于櫟陽其驛六其蔽曰同州其關曰蒲津胡三省通鑑注河中西關城東河西所以護蒲津浮梁者也續通典蒲津關戰國時魏所置自河東而言亦曰蒲坂津自

關中而言亦曰夏陽津縣志宋大中祥符四年改爲大慶

關城久圯明嘉靖二十年復築萬曆以後河決城毀後河

流西徙故關反在東岸爲舊大慶關今河西亦稱新大慶

關有巡司在焉唐玄宗早渡蒲關詩鐘鼓嚴更曙山河野望通鳴鑿下蒲坂飛旆入秦中地險關逾

壯天平鎮尚雄春來津樹合月落戍樓空馬色分朝景鷄

聲逐曉風所希常道泰非復棄繻同張九齡奉和聖製早

渡蒲關應制魏武中流處軒皇問道回長堤春樹發高掌

曙雲開龍負王舟渡人占仙氣來河津會日月天仗役風

雷東顧重關盡西馳萬國陪還聞股肱郡元首詠康哉張

說蒲津橋贊易曰利涉大川濟乎難也詩曰造舟爲梁通

乎險也域中有四瀆黃河居其長河上有三橋蒲津是其
一隔秦稱塞臨晉名關關西之要衝河東之輻輳必由是
也其舊制橫緝百丈連艦千艘辦修竿以爲之繫圍木以
距之亦云固矣然每冬冰未合春沍初解流澌崢嶸塞川
而下如礎如臼如堆如阜或縱或捩或磨或切綆斷航破
無歲不有雖殘渭南之竹仆隴坻之松敗輒更之罄不供

費津吏咸罪縣徒告勞以爲常矣開元十有二載皇帝聞之曰嘻我其慮哉乃思索其極敷祐於下通其變使人不倦相其宜授彼有司俾鐵代竹取堅易脆圖其始而可久紆其終而就逸無疆惟休亦無彊惟恤於是大匠藏市百工獻藝賦晉國之一鼓法周官之六齊飛廉煽炭祝融理爐是鍊是烹亦錯亦鍛結而爲連鎖鎔而爲伏牛偶立於兩岸襟束於中潭鎖以持航牛以繫纜亦將厭水物奠浮梁又疏其舟間畫其鷁首必使奔斯不突積凌不隘新法既成永代作則原夫天意有四旨焉濟人仁也利物義也順事禮也圖遠智也仁以平心義以和氣禮以成政智以節財心平則應諸百神矣氣和則感生萬物矣政成則又文之經矣財節則豐武之德矣故天將儲其貞地將阜其用人將盈其力聖皇之道乾乾翼翼觀藝而無窮詠功而無極

潼關在華陰縣東北三十九里古桃林塞也左傳晉侯使詹嘉守桃林之塞杜預注潼關是也水經注河在關內南流潼激關山因謂之潼關灌水經通谷述征記所謂潼谷

水或說因水以名地也元和郡縣志先名衝關後以關西一里有潼水因以名通典秦函谷關在今靈寶縣界漢武帝徙于新安縣界至建安十六年曹公破馬超於潼關卽是中間移於今所後周文帝破東魏軍殺大將竇泰于此改名潼谷關隋大業七年移于南北鎮城間去舊關四里唐天寶二年移向北近河爲路玉海上躋高隅俯視洪流盤紆峻極實謂天險河北岸爲風陵津北至蒲關六十餘里迤邐相接自此西望川途曠然蓋神明之奧區也華州志潼關天險南薄關北阻河中通一徑車不方軌一夫當

關億萬不能踰也

唐張翥潼關賦惟皇王之建國分中外於上京憑山河以作固闕華夷而騰聲

誠曰咽喉吞八荒而則大是稱巖險控萬國以來平周有
掌貨之節禮無關門之征巨防宵局倚洪波而作鎮重扉
擊柝連太華而爲城朔中代之新號變函谷之舊名柱史
老聃擁仙雲而西邁終軍童子建使節而東行文仲不仁
廢六關而興誚王元有說封一丸而永清若用備不虞取
諸繫象作邦畿之襟帶杜奸宄之來往長空轟兮雲屯層
樓赫以霞敞登臨者有知其地雄踰越者無漏于天網亦
有孟嘗奔走長宵未曙何白馬之不談學鷄鳴而乃去逢
尉臣之一失或愚者之千慮至如楚漢爭雄沛公先入旗
鼓照耀兵戈翕習南面則三傑齊驅東井則五星俱集實
靈命之所應亦人謀而是及王道廓而已清帝業巍乎乃
立窮四塞之艱阻成百王之都邑故知建定霸期乎此關
武侯矜于固險婁敬說乎河山視前列之軌躅覽陳跡而
躋攀旣登高而能賦希駟馬以言還唐太宗入潼關詩嶠
函稱地險襟帶壯西京霜峯直臨道冰河曲繞城古木參
差影寒猿斷續聲冠蓋往來合風塵朝夕驚高談先馬度
僞曉預鷄鳴棄繻懷遠志封泥負壯情別有真人氣安知
名不名張說潼關口號應制詩天德平無外關門東復西
不將千里隔何用一丸泥崔顥題潼關樓詩客行逢雨霽
歇馬上津樓山勢雄三輔關門扼九州川從陝路去河遶

華陰流向晚登臨處風煙萬里愁張祜入潼關詩都城三百里雄險此迴環地勢遙尊岳河流側讓關秦皇曾虎視漢祖昔龍顏何處梟凶輩干戈自不閑吳融出潼關詩重門隨地險一徑入天開華嶽眼前盡黃河脚底來飛軒何滿路丹陛正求才獨我疎慵質飄然又此回温庭筠過潼關詩地形盤曲帶河流景氣澄明是勝遊十里曉鷄關樹暗一行寒雁隴雲愁片時無事溪泉好盡日凝眸岳色秋塵尾角巾應曠望更嗟芳靄隔秦樓薛逢潼關河亭詩重岡如抱岳如蹲屈曲秦川勢自尊天地並功開帝宅山河相湊束龍門櫓聲嘔軋中流渡柳色微茫遠岸村滿眼波濤今古事年來惆悵與誰論徐夔憶潼關詩洞壑雙扉入到初似從深窅覩高墟天開白日臨軍國山夾黃河護帝居隋煬遠遊宜不反奉春長策竟何如須知皇漢能局鑷延約年過四百餘許渾行次潼關題驛後軒詩飛閣極層臺終南北路迥山形朝闕去河勢抱關來雁過秋風急蟬鳴宿霧開平生無限意驅馬住塵埃元陳基潼關詩河渾渾關崿崿太古以來神禹鑿前車未行後車却去馬一鳴來馬愕自從虎視繼龍興周道不復如砥平至今惟有秦川路千里秋風落葉聲

彭衙堡在白水縣東北六十里元和郡縣志春秋時秦晉

戰于彭衙是也謹案史記秦武公伐彭戲氏彭戲即彭衙也古衙戲字同

鄭桓公墓在華州西關路南世本桓公居棫林皇覽桓公

葬鄭縣番謹案番即蕃字水經注蕃邑殷契之故居世本日契居蕃闕駟曰在鄭縣之西

子夏石室在邵陽縣飛浮山史記仲尼弟子列傳注索隱

曰同州西河縣有子夏室石學堂水經注三累山南有石

室西面有兩石室北有兩石室皆因阿結牖連局接闡東

廂石上猶傳杵臼之跡昔子夏教授西河疑即此也河水

又逕子夏石室東南北又有二石室臨側河崖即子夏廟

室也

秦平舒城在華陰縣西北六里史記秦本紀始皇使者夜過平舒道括地志平舒故城在縣西十里水經注城之西卽少華山也

長城在蒲城縣東五十里三秦記秦築長城卽是塹洛也太平寰宇記秦孝公九年築長城簡公二年塹洛今沙苑長城是也

漢劉仲城在郃陽縣西二里通志卽郃陽故城也漢書功臣表劉仲封郃陽侯括地志郃陽故城魏文侯十七年攻秦至鄭而還也

唐房彥謙劉仲城詩千載遺蹤寄薜蘿沛公鄉里漢山河長陵亦是閒邱壟異日誰

知與仲多

藏馬谷在華陰縣東雍勝略漢武帝求仙於華山下造集
靈宮存仙殿望仙門有神馬自華山出帝令置內棧馬不
久留令人尋之見在此山谷中石龕下故名藏馬谷東北
谷中石馬跡尙存

武城在華州東二十一里括地志一名武平城通志光武
征隗囂所築俗名光武城謹案武城之名見于史記秦本
紀非光武所築也光武蓋增修

之
耳

司馬遷墓在韓城縣南二十里水經注司馬子長墓前有
廟廟前有碑永嘉四年漢陽太守殷濟瞻仰遺文大其功
德遂建石室立碑樹柏太史公自序曰遷生龍門是其墳

虛所在矣雍勝略太史公墓在芝川鎮墓前有坡今號司

馬坡

唐牟融司馬遷墓詩落落長才負不羈中原回首益堪悲英雄此日誰能薦聲價當時衆所推一代高風

留異國

百年遺跡剩殘碑經過詞客空惆悵落日寒烟賦黍離謹案褚遂良隨清娛墓志載永徽二年九月判同

州夜靜

坐於西廳見一女子盛裝泣訴曰妾漢太史司馬遷之侍妾趙之平原人姓隨名清娛瘞於長樂亭之西不

揣人神之

隔乞一言銘墓以垂不朽且云圖籍未載世人莫有知者遂良感其意爲之作銘事頗涉怪因附於此

班超墓在華陰縣西二十里官道旁

楊震墓在華陰縣東三十里白孔六帖後漢楊震改葬華

陰潼亭先葬十日有大鳥丈餘集震墓前葬畢飛去時人

立鳥像於墓前名臣奏議唐太宗貞觀十一年行幸過漢

太尉楊震墓傷其以忠非命親爲文以祭之僕射房元齡

進曰楊震雖當天枉數百年後方遇聖君停輿駐蹕親降神作可謂雖死猶生沒而不可朽通志華陰縣東震墓前左右共七冢明萬歷初建享堂拓地三十四畝堂圯本朝順治丙申前使湯斌重建

前秦王猛墓在華陰縣西三里

隋觀德王雄墓在潼關城西十里朝野僉載舒綽善相冢吏部侍郎楊恭仁欲改葬觀王綽定一土堪葬曰此所擬處深五尺之外有五穀若得一穀卽是福地公侯世世不絕恭仁卽向綽定處令人掘深七尺得一穴如五石甕有粟七入斗縣志雄隋宗室有唐中書侍郎岑文本碑今碑

不存

唐白樓在府城內集古錄同州有白樓唐賢眺詠之所白樂天詩烟入白樓沙苑暮卽此

遊春亭在華陰縣敷水之西雍勝略杜甫謫華州司功嘗題詩其處又東二里曰西谿

睿宗橋陵在蒲城縣西北三十里豐山唐書玄宗本紀開元四年十月庚子葬大聖眞皇帝於橋陵文獻通考橋陵在京兆奉先縣界關中陵墓志陵在縣北豐山周四十里前襟浩泉之水長安志陵在縣宣化鄉積善村封內四十二里陪葬太子三莊惠太子惠文太子惠宣太子公主三涼

國鄔國金仙

謹案涼國長公主碑開元十二年立蘇頌文
明皇八分書鄔國長公主碑開元十三年立

張說文明皇八分書金仙長
公主碑徐嶠之文明皇行書

玄宗泰陵在蒲城縣東北三十里金粟山唐書代宗本紀

廣德元年三月辛酉葬至道大聖大明孝皇帝于泰陵大

唐新語玄宗常謁橋陵至金粟山睹岡巒有龍盤鳳翔之

勢謂左右曰吾千秋後宜葬此地寶應初追述先志而置

山陵焉長安志陵在懷仁鄉敬母村封內七十六里陪葬

一內侍高力士謹案力士碑大歷
十二年立行書

憲宗景陵在蒲城縣東北三十里金幟山唐書穆宗本紀

元和十五年五月庚申葬聖神章武孝皇帝于景陵長安

志陵在縣東北豐陽鄉陪葬后妃三懿安郭后孝明鄭后
王賢妃會典唐憲宗陵蒲城縣祭

王仁皎墓在府西二十里羌白鎮唐書本傳仁皎玄宗后
父封祁國公卒贈太尉益州大都督諡昭宣詔張說爲其
碑文帝親書石焉

謹案今神道碑尚存

穆宗光陵在蒲城縣北二十里堯山唐書敬宗本紀長慶
四年十一月庚申葬睿聖文惠孝皇帝于光陵長安志陵
在寧康鄉普濟延興二村封內四十里陪葬后二恭僖王
后貞獻蕭后關中陵墓志光陵宋開寶間修葺

寧王憲墓在蒲城縣北十五里唐書宗室列傳讓皇帝憲

開元二十九年薨葬橋陵旁號其墓曰惠陵長安志陵在
豐陽鄉封內一十里

李思訓墓在蒲城縣西十五里通志唐雲麾將軍有李邕

書碑

謹案碑題贈秦州都督李昭公蓋仍任雲麾將軍非官止于此也碑以開元八年六月立歲久不知所在

明正德中御史劉遠夫謫爲蒲城簿訪出以鐵束錮之

五代竇沂公貞固墓在蒲城縣北四十里宋史本傳開寶
二年病自爲墓誌

宋陳搏墓在華岳希夷峽關中陵墓志搏隱華陰雲臺觀
沒于張超谷石室中遺骨爲道士時出乞施明嘉靖中直
指姚一元遷於玉泉院後復瘞峽內斷其鑱不復再上

冰橋在韓城縣東北禹村縣志每歲大雪時合驚蟄時解時日不爽龍門斷岸危峽河冰蔽山而下至此山立若神驅之者頃結成橋車馬擔負行同陸路其結其解皆以夜間故行者無虞宋建炎元年金人分道入寇官軍扼于河乃自韓城履冰渡卽此

金師節婦墓在澄城縣南雷村郭黻師節婦傳有司議師氏貞潔足以激頽風端謹足以爲婦則謹案諡法能因其

所守曰節請諡曰節上可其事命官致祭

金郭黻師節婦賜諡贊伊雷之

妻曰師其氏守節終養安貞一紀不幸被誣明心以死悠悠蒼天不諒人只名動朝廷恩光閭里賜以美諡筆之信史旣端婦則以告君子

元安定伯蒙天佑墓在大荔縣義井村西北蕭𪔐神道碑
天佑字佑之官至總管府萬戶以子懷口貴得贈安定郡

伯謹案碑延佑五年立

鳳

翔

府

疆

域

圖

疆域

東北交永壽縣界一百六十五里

東交武功縣界一百五十里

界二百六十五里

東南交藍屋縣界二百六十五里

北交靈臺縣



關中勝蹟圖

鳳翔府

關中叢書

界十七里

西北交華亭縣界二百十里

西交清水縣界二百七十里

西南交鳳縣界二百八十里

細川谷水

漆水

雍山

半坡鋪

靈山

鎮縣

洛谷水

里十七百一



隴州

陽陽縣

隰縣

隰縣

監門山

二里關

大散嶺

秦嶺

吳山

西秦山

龍盤山

和尚原

煎茶坪

香嚴

陳倉山

石塔山

改道水源

福景山

青崖山

慈山

八河山

隴山

汧水

秦嶺

青陽峽

天井山

金門山

方山原

長蛇水

蒲峪河

金河

塔兒峽

馬奔山

石墨洞

西平原

金陵河

清澗河

陸川

原陵

草壁峪


蛇兒嶺

離川

草壁峪



太白山



樓星
鳳池
洞

處海雲觀

缺神雷

山笏萬




洞陽朝


岩雪大

橋仙三

三官池








東坡祠

鳳翔府城



東湖


尚 天
廟 聖
圖 周

元聖周公廟

天柱山



鳳鳴山



元聖周公廟

關中勝蹟圖志卷十五

兵部侍郎兼都察院右副都御史陝西巡撫畢沅纂

地理

鳳翔府釋名雍勝略唐至德初置取鳳鳴岐山之義沿革

一統志治在省城西北三百六十里禹貢雍州之域周王

畿地春秋時為秦國都始皇時為內史地漢初屬雍國謹案

章邯居此漢志高祖元年屬雍國二年為中地郡九年復為內史武帝建元六年為右內史太初元年更名右扶風

後為右扶風地後漢因之謹案後漢屬司隸三國魏為扶風郡地

謹案元和志右扶風魏文帝除右字為扶風郡晉為秦國地謹案太康八年也後魏太延

三年於雍縣置平秦郡謹案通典扶風郡後魏改平秦郡後魏亦有扶風郡非今地太

和十一年兼置岐州謹案元和志鳳翔府晉為秦國後魏太武于州理東五里築雍城鎮文帝

改鎮為西魏改郡曰岐山謹案隋志後魏為平秦郡西魏為岐山郡文獻通考則云西魏

改為岐陽郡攷文帝本紀大統十一年有西狩岐陽之說是通考未為無據也隋開皇三年郡廢

大業初改州為扶風郡唐武德初復曰岐州天寶元年復

曰扶風郡至德元載改曰鳳翔郡二載升為西京鳳翔府

上元元年置鳳翔軍節度使二年罷京謹案唐志上元二年罷京元年曰西

都應是寶應元年見肅宗本紀隸關內道五代岐州謹案通鑑乾祐元年蜀改為岐陽軍宋

曰鳳翔府扶風郡鳳翔軍節度屬秦鳳路金亦曰鳳翔府

為鳳翔路治謹案金志皇統二年升為府軍名天興大定十九年更名鳳翔軍二十七年升為總管府

元初仍立鳳翔路總管府至元九年更為散府屬陝西行

省明曰鳳翔府屬陝西布政使司本朝因之領縣七曰鳳
翔岐山寶雞扶風郿麟遊汧陽州一曰隴州形勝鄭康成
詩譜地形險阻原田肥美獨孤及送孫傳御赴鳳翔序右
扶風之地跨枕隴蜀扼塞西門沈珣授崔琪鳳翔節度使
制乃眷岐陽襟汧擁漢古稱右輔以扶助王畿今爲別京
以屏藩戎落唐書王承元傳鳳翔右袤源原地平少險阻
太平寰宇記渭汧岐漆雍五水皆會於郡界府志四山之
中五水之會關隴阻其西益門扼其南府城明一統志唐
節度傳李茂貞建萬曆二年增築周一十二里有奇門四
東曰迎恩西曰保和南曰景明北曰寧遠

鳳翔縣釋名通志本雍縣唐改鳳翔沿革一統志附郭春

秋時雍邑為秦都謹案漢志云秦惠公都之後置雍縣漢屬右扶風後

漢及晉因之後魏為平秦郡及岐州治隋為扶風郡治唐

為鳳翔府治至德二載改曰鳳翔縣又析置天興縣謹案元和

志以為永泰元年寶應元年寶應元年省鳳翔縣入天興宋因之金大

定十年改天興縣曰鳳翔謹案金志以為大定十九年時以天興字與慶衍殿名字音相

同故仍為府治元明不改本朝因之唐姚合題鳳翔西郭新亭詩西郭塵埃外

新亭制度奇地形當要處人力是閑時結構方殊絕高低

更合宜棟梁清俸買松竹遠山移佛寺幽難敵仙家景可

追良工慙巧盡上客恨逢遲兩面寒波漲當前軟柳垂清
虛宜月入涼冷勝風吹宴賞軍容靜登臨妓樂隨魚龍聽
弦管鳧鶴識旌旗泛鷁春流闊飛觴白日欵閑花長在戶
嫩蘚乍緣墀永望情無極頻來困不辭雲峯晴轉翠烟樹

曉逾滋向野惟貪靜臨空遠覺
危行人如不到遊樂更何爲

岐山縣釋名許慎說文邽周太王所封字或作岐因山以
名之也漢書郊祀志太王建國於岐梁路史古有岐伯黃
帝至岐見岐伯引載而歸是也沿革一統志治在府東五
十里漢右扶風雍美陽二縣地後魏太平眞君六年置周

城縣屬平秦郡後周廢天和四年置三龍縣謹案元和志
割涇州鶉觚

南界隋開皇十六年改曰岐山縣屬扶風郡唐屬鳳翔府

謹案唐志貞親七年析
置岐陽縣元和三年省宋金元明不改本朝因之形勝王

穀岐山懷古賦天柱巍崒太白鬱蒼汧流分導渭水環襄

府志渭水南營潢河東合周原中奠天柱後擊縣城太平

寰宇記大業九年移縣城于岐山之麓通志唐武德四年

建元至元二十五年明景泰元年增築周五里有奇門二

寶雞縣釋名元和郡縣志乾元初改陳倉為寶雞以有陳

倉鳴雞之瑞故名之沿革一統志治在府西南九十里秦

置陳倉縣漢屬右扶風謹案通典漢陳倉城在縣東三十里後漢及晉因之

謹案漢獻帝起居注陳倉縣屬漢安郡蓋中平六年仍分扶風都尉為漢安郡也郡領五縣曰雍渝麋杜陽泝陳倉

又顧野王輿地志云蒯城縣陳倉之鄉聚名也周緹所封晉武帝咸寧四年于陳倉立縣考緹沛人所封在沛城父

縣不在此地蒯說文以為蒯在鄂縣亦非此縣鄉名野王之說不足為據東晉末廢改置苑川

縣後魏因之謹案苑川或作宛川同晉陳倉苑川二縣並有後魏併為苑川縣西魏復曰

陳倉謹案大統十一年復後周兼置顯州尋廢謹案周地圖記州天和三年置四年廢

隋開皇十八年復置陳倉縣仍屬扶風郡唐屬鳳翔府改

曰寶雞謹案舊唐書志至德二年二月十五日改鳳翔十八日改寶雞宋金元明不改本

朝因之形勝通志左金陵右玉澗面渭水背原陵地形險

阻之處縣志序北屏山原南扼雲棧清渭金陵玉澗三水

相環如帶縣城元和郡縣志魏太和中郝昭築陳倉城謹案

即今城址通志唐至德中重建明景泰二年增築周二里有奇

門三

扶風縣釋名通志唐貞觀初以扶風名縣仍漢右扶風名

也沿革一統志治在府東一百十里漢美陽縣地唐初為

岐山縣地武德三年分置漳川縣謹案唐志作圍川古字同四年屬稷

州貞觀八年改曰扶風縣屬岐州至德中屬鳳翔府宋因
之金初改曰扶興尋復故元明不改本朝因之形勝陳浩
扶風縣文廟記扶風古縣在京之西環渭而北望據關輔
之首雄壓劇秦之大有通志東臨漆水西接岐山南阻渭
流北據鳳嶺縣城通志明景泰元年建因漆漳爲池周四
里門七

郿縣釋名詩大雅申伯信邁王餞于郿毛傳秦文公所營
元和郡縣志郿本秦城沿革一統志治在府東南一百十
里漢郿縣屬右扶風爲右輔都尉治後漢及晉因之後魏
廢太平眞君六年改置平陽縣屬武都郡西魏改縣曰郿

城謹案晉郿縣姚秦改曰郿城後魏改曰平陽西魏仍曰郿城後周改置周城縣謹案周城

本岐山縣後周廢故縣復置于此天和元年於縣置雲州周書尉遲運進爵周城縣公以此

建德三年州廢隋開皇十八年改縣曰渭濱大業二年又

改曰郿縣屬扶風郡義寧二年於縣置郿城郡謹案郡領郿及鳳泉

二唐武德初改郿州三年州廢縣屬稷州七年改岐州後

屬鳳翔府宋因之金貞祐四年分屬恆州元初升為郿州

至元初復為縣屬奉元路謹案元志舊為郿州添置柿林縣至元元年省郿州為郿縣廢

柿林攷舊省志元初郿州隸平涼府至元中屬安西路柿林廢縣在今縣東四十里明還屬鳳翔府

本朝因之形勝府志亘終南環渭水太白之所盤踞鳳泉

斜谷之所浸匯縣城明一統志元至大元年建景泰隆慶

間先後增築周三里許門三

麟遊縣釋名通志隋義寧初獲白麟於廢仁壽宮因置縣

沿革一統志治在府東北一百二十里秦杜陽邑謹案國策蘇代

說秦王封小令尹以杜陽即其地漢置杜陽縣屬右扶風後漢初廢永和

二年復置仍屬右扶風晉廢隋大業初改置普潤縣屬扶

風郡謹案元和志隋置縣于漢漆縣地寰宇記云以杜岐漆三水灌溉田疇故名義寧元年增

置麟遊縣兼置鳳棲郡二年改郡曰麟遊兼領普潤縣唐

武德元年改郡曰麟州貞觀元年州廢二縣俱屬岐州後

俱屬鳳翔府謹案唐志普潤縣貞觀元年屬鳳翔府宋金因之元廢普潤縣

入麟遊屬鳳翔路明屬鳳翔府本朝因之形勝縣志因山

為城因澗為池麟川遶而鳳臺峙四山環而道路險縣城

通志隋義寧中建明天順中增築外城周九里有奇門三

汧陽縣釋名太平寰宇記後周縣以在汧水之北而名沿

革一統志治在府西少北七十里漢置隃麋縣屬右扶風

謹案漢志隃麋莽曰扶亭元和志本後漢為隃麋侯國

隃麋澤在縣西八里漢以此名縣案

司馬彪志作隃麋十六國春秋苻堅太初元年苻

雙以上邽叛乘勝至隃眉亦即隃麋二字之誤晉省入

汧縣謹案後魏以此為南由縣見後周置汧陽縣兼置汧

元和志隋志云西魏改為鎮陽郡尋廢郡謹案元和志周武帝置隋屬扶風郡唐屬隴

州宋因之金移隴州來治元仍屬隴州明嘉靖中改屬鳳

翔府謹案明會典以為本朝因之形勝府志南臨汧水北

嘉靖三十八年

倚馮河五里坡在其左月典山在其右縣城雍勝略唐太和
和中築於北山麓畔元至正二年移今縣西五里界汧暉
二河之間通志今城周三里有奇門四

隴州釋名元和郡縣志魏改東秦為隴州因山為名沿革

一統志治在府西少北一百五十里周時秦汧邑謹案史記秦本

紀文公獵汧渭之交即其地孔穎達毛詩正義云襄公徙汧故城在今隴州南二里漢置汧縣屬右

扶風後漢及晉因之後魏置隴東郡正光三年兼置東秦

州及汧陰縣西魏廢帝三年改州曰隴州謹案元和志縣以為文帝改縣

曰杜陽後周復曰汧陰隋開皇三年郡廢五年改縣曰汧

源大業二年州廢屬扶風郡義寧二年復置隴東郡唐武

德元年復曰隴州天寶元年改爲汧陽郡乾元元年復曰

隴州屬關內道天復元年置保勝軍節度宋仍曰隴州汧

陽郡屬秦鳳路金移州治汧陽謹案海陵時曾隸熙秦路大定二十七年復故元

復移治汧源屬鞏昌路明初省汧源縣入州謹案元史仁宗本紀延祐

四年併汧源入隴州是元初併入後復置至明更併之也持史志不及之耳屬鳳翔府本朝因

之形勝錢翊李繼文隴西防禦使制橫當隴首地有提封

之勝軍多革甲之雄袁楷建署記西控天水金城北通回

中蕭關州志左有隴山右有汧水五峯在前靈谷在後爲

秦鳳要地州城通志西魏隴州在州南周明帝移今治明

景泰元年改築周五里有奇門四

關中勝蹟圖志卷十五終

關中勝蹟圖志卷十六

兵部侍郎兼都察院右副都御史陝西巡撫畢沅纂

名山

鳳翔府雍山在鳳翔縣西北三十里水經注雍水出雍山應劭地理風俗記四面積高曰雍山

杜陽山在鳳翔縣東北二十五里水經注故雍縣有杜陽山北有杜陽谷金史地理志鳳翔倚有杜陽山雍勝略杜陽山杜水所出通志唐岐州刺史柴紹破突厥於杜陽谷卽此

靈山在鳳翔縣西二十五里通志一名靈鷲山相近有彭

祖原

五時原在鳳翔縣南二十里史記秦本紀襄公始祠上帝
西時文公十年初爲鄜時宣公四年作密時封禪書秦文
公夢黃蛇自天下屬地其口止於鄜衍史敦曰此上帝之
徵於是作鄜時祭白帝宣公作密時於渭南祭青帝靈公
作吳陽上時祭黃帝作下時祭炎帝獻公作畦時櫟陽祠
白帝及秦并天下諸祠唯雍四時上帝爲尊漢二年高祖
入關曰吾聞天有五帝而有四何也莫知其說於是高祖
曰吾知之矣乃待吾而具五也乃立黑帝祠命爲北時漢
書地理志雍縣有五時水經注五時祠以上祠祀五帝

謹案

太平寰宇記作三時原以秦文公廊時宣公密時靈公吳陽上時在此原故號三時原也又于扶風縣亦載三時原云在縣南二十里今考扶風漢美陽地班志既稱五時皆在雍縣則不得復在美陽意其為複出之誤當以在鳳翔縣者為正

石鼓原在鳳翔縣南二十里元和郡縣志石鼓文在天興

縣南二十里石形如鼓其數有十蓋紀周宣王畋獵之事

通志今原旁亦名石鼓鎮唐韓愈石鼓歌張生手持石鼓文勸我試作石鼓歌少陵無人

謫仙死才薄將奈石鼓何周綱凌遲四海沸宣王憤起揮天戈大開明堂受朝賀諸侯劍佩鳴相磨蒐于岐陽騁雄

俊萬里禽獸皆遮羅鐫功勒成告萬世鑿石作鼓隳嵯峨從臣才藝咸第一揀選撰刻留山阿雨淋日炙野火燎鬼

物守護煩撝訶公從何處得紙本毫髮盡備無差訛詞嚴義密讀難曉字體不類隸與科年深豈免有缺畫快劍斫

斷生蛟鬣鸞翔鳳翥衆仙下珊瑚碧樹交枝柯金繩鐵索鎖紐壯古鼎躍水龍騰梭陋儒編詩不收入二雅褊迫無

關中勝卷十六 二 關中叢書

委蛇孔子西行不到秦倚撫星宿遺羲娥嗟予好古生苦
晚對此涕淚雙滂沱憶昔初蒙博士徵其年始改稱元和
故人從軍在右輔爲我度量掘白科濯冠沐浴告祭酒如
此至寶存豈多氈苞席裏可立致十鼓祗載數駱駝薦諸
太廟比郃鼎光價豈止百倍過聖恩若許留太學諸生講
解得切磋觀經鴻都尚填咽坐見舉國來奔波剜苔剔蘚
露節角安置妥帖平不頗大廈深簷與蓋覆經歷久遠期
無佗中朝大官老于事詎肯感激徒姘姍牧童敲火牛礪
角誰復著手爲摩挲日消月爍就埋沒六年西顧空吟哦
羲之俗書趁姿媚數紙尚可博白鵝繼周八代爭戰罷無
人收拾理則那方今太平日無事柄任儒術崇邱軻安能
以此上論列願借辯口如懸河石鼓之歌止于此嗚呼吾
意其蹉跎韋應物石鼓歌周宣大獵兮岐之陽刻石紀功
兮煒煌煌石如鼓形數止十風雨缺訛苔鮮澀今人濡紙
脫其文旣擊旣埽白黑分忽開滿卷不可識驚潛動蟄走
云云喘委迤相糾錯乃是宣王之臣史籀作一書遺此天
地間精意長存世冥冥秦家祖龍還刻石刻石之罘李斯
蹟世人好古猶共傳持來比此殊懸隔宋蘇軾石鼓詩冬
十二月歲辛丑我初從政見魯叟舊聞石鼓今見之文字
鬱律蛟蛇走細觀初以指畫肚欲讀嗟如箝在口韓公好

古生已遲我今况又百年後強尋偏傍推點畫時得一二
遺八九我車既攻馬亦同其魚維鱗貫之柳古器縱橫猶
識鼎衆星錯落僅名斗糲糊半已似癩胝詰曲猶能辨跟
肘娟娟缺月隱雲霧濯濯嘉禾秀稂莠漂流百戰偶然存
獨立千載誰與友上追軒頡相唯諾下挹冰斯同穀穀憶
昔周宣歌鴻雁當時籀史變蝌蚪厭亂人方思聖賢中興
天爲生耆耆東征徐淮闕虢虎北伐犬戎隨指喉象胥雜
杏貢狼鹿方召聯翩賜圭白遂因鞞鼓思將帥豈爲考擊
煩矇眊何入作頌比嵩高萬古斯文齊岫巒勳勞至大不
矜伐文武未遠猶忠厚欲尋年代無甲乙豈有名字紀誰
某自從周衰更七國竟使秦人有九有掃除詩書重法律
投棄俎豆陳鞭杻當年何人佐祖龍上蔡公子牽黃狗登
山刻石頌功烈後者無繼前無偶皆云皇帝巡四國烹滅
強暴救黔首六經既已委灰塵此鼓亦當遭擊掊傳聞九
鼎淪泗上欲使萬夫沉水取暴君縱欲窮人力神物義不
污秦垢是時石鼓何處避毋乃天公令鬼守興亡百變物
自閑富貴一朝名不朽細思物理坐嘆
息人生安得如汝壽 已上係鳳翔

岐山在岐山縣東北五十里書禹貢導沂及岐孔安國傳

岐在雍州正義岐在右扶風美陽縣西北詩大雅率西水
濟至于岐下周頌彼徂矣岐有夷之行河圖括地象岐山
在昆侖東南爲地乳國語內史過曰周之興也鸞鷲鳴于
岐山呂氏春秋岐山九山之一也漢書地理志岐山在美
陽縣西北中水鄉周太王所邑水經注小橫水歷周原下
水北卽岐山顏師古漢書注其山兩岐俗呼箭括嶺隋書
地理志岐山縣有岐山唐六典關內道名山曰岐山括地
志岐山亦名天柱山太平寰宇記周鸞鷲鳴于山上時人
亦謂此山爲鳳凰堆謹案俗以此爲鳴鳳岡元仇聖耦或
有鳴鳳岡詩自注云在岐山縣北
云其峯高峻迥出諸山狀若天柱因以爲名一統志岐山

之最高處爲箭括嶺以嶺巔有缺故名或以爲卽太王所

踰之梁山者誤通志山之西爲三龍山後周以此名縣

謹案

三龍故城在今縣東北

五將山在岐山縣北五十里與麟遊縣接界晉書太元十

年慕容冲逼長安苻堅以讖書有云帝出五將久長得遂

奔五將山爲姚萇將吳忠所執水經注扶風杜陽縣有五

將山

謹案杜陽今屬麟遊

耆闍山在岐山縣東北四十里元一統志耆闍山在縣北

通志一名崛山上多石穴唐時建耆闍山寺山有金仙洞

洞前臥佛一軀其後爲滴泉盈而不溢山後爲石霸嶺又

洞東十里有景陽洞前有閣後有流泉

謹案水經注西域波麗國有耆闍崛

山兩峯雙立相去二二三里鷲鳥常居其嶺是山之名蓋擬此也

鳳凰山在岐山縣北十五里周公廟後通志卽鳳鳴處山下有朝陽洞

青峯山在岐山縣南百五十里通志峯巒蒼翠扶寶雞界石樓山在岐山縣南五十里接寶雞界通志山形如樓閣故名上有龍湫禱雨輒應

周原在岐山縣東北四十里詩大雅周原膺膺毛傳周原漆沮之間也徐廣史記音義岐山南有周原水經注小橫水逕周城歷周原下史記正義岐山下有周原上置城通

志原東西橫亘地寬平而肥美

謹案寰宇記三時原亦謂之周原在天興縣

五丈原在岐山縣南五十里接郿縣界蜀志建興十二年

諸葛亮悉大衆由斜谷出據武功五丈原與司馬懿對於

渭南分兵屯田爲久住之基耕者雜於渭濱居民之間而

百姓安堵軍無私焉水經注渭水逕五丈原北渭水南原

也又斜水逕五丈原東諸葛亮與步騭書曰僕前軍五丈

原原在武功西十里餘魏書地形志平陽有五丈原

謹案平陽

故城在今縣西南

通鑑地理通釋呂祉曰原高平廣遠行軍者必

爭之地雍大記在斜谷口諸葛亮遣孟談據五丈原卽此

通志原西有白玉嶺

唐温庭筠五丈原詩鐵馬雲騅久絕塵柳陰高壓漢營春天清殺氣騰關

右夜半妖星照渭濱上國臥龍空悟主中原得鹿不因人象牀寶帳無言語從此譙周是老臣

龍尾坡在縣東二十里雍大記唐鄭畋破黃巢兵處一統志晉義熙十一年夏將赫連建入新平後秦將弼與戰於龍尾堡擒之唐武德七年移縣治于龍尾驛城蓋昔時嘗置堡及驛于此故也

令狐坡在岐山縣南二十里通志一名渭陽坡其下卽蓮花灣又縣南二十五里有永樂洞其下有珍珠泉泉水清激如珠迸出深丈許

已上岐山

飛鳳山在扶風縣南一里雍勝略在漳川之南形如飛鳳故名

明月山在扶風縣北五十里明一統志白石燦爛夜有光

如月山有清風洞洞口徑尺許風聲常吼其源不測謹案山東

接乾州界

吳雙山在扶風縣北五十里通志四峯插入雲表山陰屬

麟遊界

美山在扶風縣西北五十里一統志山產奇石青紺嵌空
比於靈璧美水出於此

茂陵山在扶風縣東三十里通志陵一作林相傳爲漢威

侯馬超故居已上扶風

太白山在郿縣東南四十里史記封禪書自華以西名山

有岳山裴駟集解武功縣有太壹山又有岳山魏書地形志美陽縣有太白山隋書地理志郿縣有太白山唐六典關內道名山曰太白山唐書地理志郿縣有太白山水經注太壹山亦曰太白山在武功縣南去長安三百里不知其高幾何俗云武功太白去天三百山下軍行不得鼓角鼓角則疾風雨至周地圖記山半橫雲如瀑布則澍雨人常以爲候語曰南山瀑布非朝卽暮唐書天寶八載太白山人李渾上言有神人言金星洞內有玉版石紀聖皇福壽之符命御史中丞王鉷入山求獲之於是封太白山神爲神應公四時祭祀改金星洞爲嘉祥洞一統志鍾西方金

星之秀關中諸山莫高於此上有湫池雖三伏亦凝冰道
書以爲第十一洞天也通志東麓有三官池池之西南爲
大雪巖巖南有萬笏峯峯之東南有黑風嶺嶺之西南有
松花坪西南爲二仙山東南爲救苦嶺嶺之西南有神窪
窪之東南有冲天嶺西南有分天嶺西有孤雲窪窪西南
有太白池雷神池二太白池三太白池玉皇池佛池三清
池山下有達摩洞又有鍾呂坪山之西有瓦窰山其相近
有駝羊峯山之北其上有仰天池山巒若疊嶂迤邐凌高
及登太白峯則俯瞰若岡阜矣

唐李白登太白峯詩西上
太白峯夕陽窮登攀太白

與我語爲我開天關願乘冷風去直出浮雲間舉手可近
月前行若無山一別武功去何時復見還宋蘇軾太白山

下早行至橫渠鎮書崇壽院壁詩馬上續殘夢不知朝日
昇亂山橫翠嶂落月澹孤燈奔走煩郵吏安閒愧老僧再
遊應眷眷聊以記吾曾謹案太白山之陽爲洋縣境如
洋縣之石銜青山神明琉璃寒泉宋軍華陽福仁女冠金
紫三嶺南岐諸山
合之皆太白也

臣謹案禹貢終南惇物至于鳥鼠程大昌雍錄謂終南
既高且廣多產百物故禹貢言終南惇物不當別有一
山名惇物也然太平寰宇記於武功縣載之地理志郡
國志寰宇記又云敦物山卽華山夫華山在渭南武功
縣在渭北相距可五六百里而以爲華山連亘所經竊
所未喻考今武功縣疆域以渭水爲限若漢武功故城
在今郿縣境乃在渭南水經注渭水東逕武功故城北

南對太白山是也詳繹禹貢文義惇物與終南嶧屬不
得謂別在渭水之陽後人皆由不考今之武功非漢之
武功故有此誤竊以雍州大山莫奇于大華莫長於終
南莫峻於太白太華終南皆見禹貢而太白闕如意所
謂惇物者唯太白足以當之一統志以郿縣之武功山
爲卽垂山旣爲可信且與太白相連屬則太白爲惇物
更無疑義謹詳著于此其太壹終南辯見前卷不復列
云

武功山在太白山南漢書地理志武功縣東有垂山

謹案史記

索隱引此作華山因古文華作萐與垂字形近也秦本九
紀武公伐彭戲氏至華山下居平陽封宮疑亦卽此山九

域志武功縣有武功山雍大記太白武功二山在郿縣蓋舊武功縣地一統志俗譌爲嵒山其山有楓木均白鶴峯雷崖又其阻有齊雲山

斜谷在郿縣西南三十里史記貨殖傳棧道千里惟褒斜縮轂其口西都賦右界褒斜續漢書郡國志武功縣有斜谷蜀志秦宓曰三皇乘祇車出谷口今之斜谷是也建興六年諸葛亮揚聲由斜谷道取郿十二年亮率大衆由斜谷出西京賦注褒斜在長安西南南口曰褒北口曰斜長四百七十里曹操謂爲五百石穴魏書正始四年開斜谷舊道地形志平陽縣有斜谷

謹案平陽今屬岐山界

今元和郡縣志褒

斜道一名石牛道宋李子文蜀鑑斜谷在郿縣南谷中皆
穴山架木而行通志入谷口二百五十里抵鳳縣西出連
雲棧復一百五十里出谷口抵褒城谷中水南北分流卽
褒水斜水也又邸閣在斜谷口諸葛亮欲伐魏用流馬轉

運谷中故於此先治邸閣後人因建懷賢閣

宋蘇軾至下馬磧憩北山

僧舍詩南望斜谷口三山如犬牙西臨五丈原鬱屈若長
蛇有懷諸葛公萬騎出漢巴吏士寂如水蕭蕭聞馬擗公
才與曹丕豈止十倍加顧瞻三輔間勢若風捲沙一朝長
星墜竟使蜀婦髻山僧豈知此一室老烟霞往事逐雲散
故山依渭斜客來空弔古清淚落悲笳又自陽平至斜谷
宿于南山中蟠龍寺詩橫槎晚渡碧澗口騎馬夜入南山
谷谷中暗水嚮龍瀧嶺上踈星明煜煜寺藏岳底千萬仞
路轉山腰三百曲風生飢虎嘯空林月黑驚麀竄修竹入
門突兀見深殿照佛青熒有殘燭媿無酒食待遊人斫
杉松煮溪菽板閣獨眠警旅枕木魚曉動隨僧粥起觀萬

瓦鬱參差自亂千巖散紅綠門前商賈負椒莛山後
咫尺連巴蜀何時歸耕江上田一夜心逐南飛鵠

馬冢山在郿縣西南十五里紅崖頭水經注渭水東逕馬

冢北諸葛亮與步騭書曰馬冢在武功東十餘里有高勢

謹案舊志衙嶺山在縣西南十五里俗呼馬鞍山今考馬
鞍山即馬冢之訛若衙嶺山在褒城界去此尚遠不應渭

水經其地也

秦王嶺在郿縣東十里通志舊傳唐太宗居藩時屯牧於

此謹案晉書載記苻健據關中嘗稱大單于秦王傳至登
破姚萇於馬頭原後萇又滅登亦自稱秦王則郿固二

秦戰場也嶺
應以此得名

五丈原在郿縣西南二十五里接岐山界

積石原在郿縣西北二十五里接岐山縣界魏志青龍二

年諸葛亮出斜谷田於蘭坑時司馬宣王屯渭南郭淮策
亮必爭北原遂先據之晉書時亮上五丈原將北渡渭郭
淮與亮會於積石臨原而戰亮不得進還五丈原水經注
渭水東逕石原卽北原也通典郿縣有東積石西積石原
元和縣志在縣西北二十五里縣志原距五丈原二十五
里又馬頭原在清湫堡南苻登破姚萇於此已上郿縣

陳倉山在寶雞縣東南四十里一名寶雞山史記封禪書
秦文公十九年得陳寶于陳倉北阪其神若雄雞辛氏三
秦記太白山山南有陳倉山山上有石雞與山雞不別趙高
燒山山雞飛去石雞不去晨鳴山頂聲聞數十里水經注

山上有寶雞祠昔秦文公感伯道之言遊獵于陳倉遇之於北阪得數石焉其色如肝歸而寶祠之故曰陳寶其來也自東南輝煌聲如雷野鷄皆鳴故曰雞鳴神也唐書地理志寶雞縣有寶雞山元和郡縣志山在縣南十里南接梁鳳二州界路史寶雞故陳倉有陳山縣志三峯並峙為縣之勝謹案雞所止處俗名曰雞城

石鼓山在寶縣東二十里劉昭郡國志注三秦記云陳倉縣有石鼓山將有兵此山則鳴謹案府縣諸志並以為此山因周宣王獵碣得名攷劉昭注史時獵碣猶未出土不得以之為據今因刪正

蟠龍山在寶雞縣北隴蜀餘聞蟠龍山在縣北二里通志

金陵河逕其左故又謂之陵原

益門山在寶雞縣西南十五里雍勝略卽秦嶺北麓之谷
通志山巖險阻凡至梁益者必取道於此故曰益門

秦陵山在寶雞縣南六十里帝王世紀秦寧公墓葬西山

大麓號秦陵山括地志在陳倉縣西北三十七里雍勝略

南山之脊也

謹案雍勝略及通志並以此爲秦嶺蓋未考也

大散嶺在寶雞縣南五十二里通鑑光啓二年上自寶雞

幸興元使王建負傳國璽登大散嶺胡三省注嶺在梁泉

縣松嶺堡南

謹案梁泉今屬鳳縣

大蟲嶺在寶雞縣東北十五里接鳳翔縣界宋史紹興十

年吳璘楊政與金將撒離喝夾渭而軍璘置軍大蟲嶺撒離喝覘之曰善行兵者立於不敗之地此難與爭遂引去縣志一名西平原據高峻處故謂之嶺

和尚原在寶雞縣西南四十里宋中興四朝志和尚原鳳之東境抵鳳翔不能百里自兩當縣直出鳳州取大散關距和尚原纔咫尺文獻通考在大散關之東距寶雞兩驛過此則路徑散漫無所限隔

香巖在寶雞縣西二十里縣志其相近有天眞洞爲邱長春修真處

佛巖在寶雞縣西四十里縣志洞開陡壁飛閣懸樓頗爲

奇麗已上寶雞

馬脊山在汧陽縣南二十里通志山有秦王洞石穴數丈

寒冽逼人

龍泉山在汧陽縣東十五里雍勝略有泉出其下故名

箭括嶺在汧陽縣南十里一統志舊置關於此

石墨洞在汧陽縣東南三十里石門遺事洞產石墨漢尚

書令僕丞郎月給隃麋墨二枚卽此然墨粗不堪用已上汧陽

岐山在麟遊縣南五十里太平寰宇記楊素於此營仁壽

宮夷山堙谷館宇相屬

五將山在麟遊縣西南五十里水經注瀆魑水東歷五將

山金史地理志麟遊縣有五將山

謹案此當別爲一山不與醴泉之五將山同

吳雙山在麟遊縣東南四十里接扶風界通志山有四峯北曰拱辰南曰聯斗東曰萃旭西曰落照俗呼四堆山又名四峯山又名吳重山

青蓮山在麟遊縣西南二十里雍勝略其形似蓮草木葱翠通志九成宮之屏山也

鳴鳳山在麟遊縣西五里一統志與天臺山相對又名鳳臺山

天臺山在麟遊縣西五里雍勝略在九成宮之西岨

崔模嶺在縣東北四十里太平寰宇記在縣東北五十里

謹案崔模以人名嶺如馬嵬坡之例近志不辯改作
催木謂隋營仁壽宮運木至此故名其說恐不稽

石鼓峽在麟遊縣北十里通志澄水所經峽凡三折奔濤

激浪如喧雷鼓

已上麟遊

吳嶽在隴州南七十里書禹貢導沂及岐孔穎達疏吳岳
在扶風沂縣西古文以爲沂山周禮職方氏其山鎮曰嶽
山鄭康成注吳嶽也在沂爾雅河西嶽漢書地理志沂縣
吳山古文以爲沂山續漢書郡國志沂縣有吳嶽山本名
沂元和郡縣志山在吳山縣南五十里秦都咸陽以爲西
嶽今爲國之西鎮山國語謂之西吳太平寰宇記郭璞曰
吳嶽別名開山禹貢指南沂山在右扶風卽吳嶽也廣雅

曰河西曰嶽頂有五峯圖書編五峯一曰鎮西二曰大賢

三曰靈應四曰會仙五曰望輦

唐周鉞登吳嶽賦吾嘗聞戰將北羈遊極西睹吳嶽

之孤峭計羣山之莫齊由是邈崖谷遂攀躋入雲靄出沉

泥既臻頂上用視天倪雁寨殊小峨嵋甚低蓋以氣壯坤

扶雄標國祚揖白帝兮不見抱皇城而自固嵐光擁翠拓

開霄漢之心岫色橫空鎖斷東來之路帶嶠嶠旁竦峇嶢上

干碧草春含清風夏寒遙瞻魏闕迥立烟巒疑超洞府謂

在天壇中隱深溪日月之光不到外連層阜龍蛇之勢斯

蟠當其區宇正寧氛埃初見覽造化之宏制識乾坤之設

險泝水縈盈而線走隴山崩蒨而螺掩西窺劍閣霜地表

之千鐔東瞰蓬萊黛波間之數點遐徵衆岳式並隆崇彼

皆受封於百代此獨不視於三公森筭立以削成寧慚太

華暗雲凝而化出豈讓維嵩况乎萬仞凌虛千里倒影虎

踞華裔鯨吞遐境疊巘攢壁迴巖列屏捍絕域以增隘固

中原之堪永直使以禮賓九有仁服八荒臂賢以為輔弼

宅道以為封疆亦須假我嚴衛憑我巨防靜藩垣於都邑

遠隔闕於氏羌吾唐重其功崇其鎮爰升成德之號用補

極天之峻小儒是以竟日興感抽毫賦韻登詠畢兮欽岑

指長安而後進

岍山在隴州西四十里水經注泝水發南山西側俗以此山爲吳山三秦記泝水出縣西山世謂之小隴山隋書地理志泝源縣有泝山史記夏本紀注泝一作岍案有泝水故其字或從山或從水括地志山在泝源西四十里東臨岐岫西接隴岡元和郡縣志山在縣西六十里北與隴山接禹貢導泝及岐是也胡三省通鑑注小隴山在南由西北雍大記泝水所出

謹案隴山泝水所出故謂之泝山山以水稱也因爲隴山西嶺故又謂之

小隴山似與禹貢漢書異而實不悖非如今人混吳嶽與泝爲一而又紛更不定也

臣謹案史記自華以西名山七旣無泝山且析吳嶽與

嶽山爲二兩漢志及酈道元孔穎達皆以吳山爲沂山
通典元和郡縣志太平寰宇記及隴州志諸書皆以吳
與沂爲二山攷漢志吳山古文以爲沂山是古尙書說
以沂爲吳山也三秦記沂水出縣西山世謂之小隴山
是以沂爲隴山也漢志又云沂水西北入渭今沂水正
出西山與漢志合是沂山乃隴山綿亘之支非吳嶽所
及矣禹貢導沂注家指爲吳嶽古今之說異耳胡渭禹
貢錐指云吳山漢志雖云在縣西而岡巒延及其南與
嶽山本是一山自周尊沂山曰嶽山俗又謂之吳山或
又合稱吳嶽而沂山之名遂隱其論頗詭於正不得據

以爲辨證也

隴山在隴州西六十里接秦州清水縣界詩秦風阪有漆
正義隴阪也卽今隴山漢書地理志隴西縣隴坻在其西
武帝紀元鼎五年十月行幸雍遂踰隴登空同西京賦右
有隴坻之隘三秦紀隴阪九迴不知高幾許欲上者七日
乃得越高處可容百餘家有清水四注下卽隴頭水也秦
州記隴山東西一百八十里登山東望秦川四五百里極
目悵然山東人行役升此而顧瞻者莫不悲思故爲之歌
隋書地理志汧源縣有隴山雍勝略山高而長多鸚鵡亦
名鸚鵡山雍大記南踰岍隴北接沙漠其名有四一名槍

竿嶺一名米高山一名湫頭山一名龍江峽漢屬漢陽郡

刺史治名隴坻即祭遵破王元兵處通志上有縣溜匯為

澄潭名萬石潭流溢散下皆注於渭梁元帝隴頭水詩銜悲別隴頭關路漫悠

悠故鄉迷遠近征人分去留沙飛曉成幕海氣夜如樓欲識秦川處隴水向東流唐盧照鄰隴頭水詩隴阪高無極

征人一望鄉關河別去水沙塞斷歸陽馬繫千年樹旌懸九月霜從來共鳴咽皆是為勤王王維隴頭吟詩長安少

年遊俠客夜上戍樓看太白隴頭明月迥臨關隴上行人夜吹笛關西老將不勝愁駐馬聽之雙淚流身經大小百

餘戰麾下偏裨萬戶侯蘇武纔為典屬國節旄落盡海西頭員半千隴頭水詩路出金河道山連玉塞門旌旗雲裏

度楊柳曲中喧喋血多壯膽裹革無怯魂嚴霜斂曙色大明辭朝噉塵銷營卒壘沙靜都尉垣霧卷白山出風吹黃

葉翻將軍獻凱入萬里絕河源岑參隴頭分水詩隴水何年有潺潺逼路旁東西流不歇曾斷幾人腸翁緩隴頭吟

隴水潺湲隴樹黃征人隴上盡思鄉馬嘶斜日朔風急雁過寒雲邊思長殘月出林鳴劍戟平沙隔水見牛羊橫行

俱是封侯者誰
斬樓蘭獻未央

龍盤山在隴州東南百二十七里隋書地理志南由縣有
龍盤山通志在吳山舊縣東南七里

紫超山在隴州南四十里唐書地理志吳山縣有紫超山
通志今俗名紫塏山

西秦山在隴州東南百里雍大記在隴安舊縣北二十里
謹案隴安故城在州東南

關山在隴州西八十里雍大記距關中千里嶺之西有長
寧驛州志其山高峻盤折而登經五十里始至絕頂爲秦
鳳要路山上產鸚鵡

金門山在隴州西南百里一統志與天井山對峙如門渭

水流其中

謹案水經渭水東南出石門當卽此

慈山在隴州西四十里水經注汧水東歷慈山通志相近有白環谷白環水所出

秦嶺在隴州西南九域志隴州隴安縣有秦嶺山通鑑地理通釋晁氏以爲隴山秦嶺皆古之岍雍勝略秦嶺在隴安舊縣因西秦地勢相連其山高於諸岫故名

蒲谷在隴州西二十里漢書地理志汧縣北有蒲谷鄉弦

中谷

謹案汧縣故城在州東南

方山原在隴州西南一百四十里宋會要紹興十一年金

人求商州及和尚方山二原許之於是遂以大散關爲界

青陽峽在隴州西南七十里州志峽極險阻行人難進唐杜

甫青陽峽詩塞外苦厭山南行道彌惡岡巒相綿亘雲水
氣參錯林迥破角來天窄壁面削磳西五里石奮怒向我
落仰看日車側俯恐地軸弱魑魅嘯有風霜霰浩漠漠憶
昨踰隴坂高秋視吳嶽東笑蓮華卑北知崆峒薄超然侔
壯觀已謂殷寥廓突兀猶趁
人及茲嘆冥冥已上隴州

關中勝蹟圖志卷十六終

關中勝蹟圖志卷十七

兵部侍郎兼都察院右副都御史陝西巡撫畢沅纂

大川

附水利

鳳翔府汧水在鳳翔縣西三十里自汧陽縣流入通志一名汧陽河

雍水在縣南又東南流入岐山界水經注雍水出雍山東南流歷中牟溪世謂之中牟水亦曰冰井水南流而左會左陽水又與東水合世亦名之爲淬空水又東流鄧公泉注之太平寰宇記雍水源出縣西北平地

東水在縣西北三十里水經注東水北出河桃谷南流右

會南源世謂之返眼泉亂流南逕岐州城東而南合雍水
州居二水之中南則兩川之交會也通志泉出似人返眼
故名

左陽水在縣東二里水經注左陽水世名之西水北出左
陽溪南流經岐州城西又南流注於雍水縣志左陽水行
十里至西平伏行三十里至三岔復出東流合於塔寺河
故亦名塔寺水

杜水在縣東三十里水經注杜水出杜陽山其水南流謂
之杜陽川又東南流左會漆水俗謂之小橫水

鄧公泉在縣北十里水經注水出鄧艾祠北故名數源俱

發逕雍縣城南又東流注於雍水通志今名鄧水

橐泉在縣城內東南隅漢書地理志雍縣有橐泉宮

謹案宮以

泉名也通志其泉注水旋盈旋涸有似無底故名橐泉

虎跑泉在縣東北十五里通志在大像寺前一名金沙謹案

蘇軾詩金沙泉涌雪濤香灑作醍醐大地涼即此

東湖在縣東門外一統志即宋蘇軾詩鳳翔入觀之一也

岐州水苦鹽濁獨此水味甘美多芰荷修竹為郡中遊覽

之勝通志其水南流入雍水

宋蘇軾東湖詩吾家蜀江上江水綠如藍邇來走塵土意

思殊不堪况當岐山下風物尤可慚有山秃如赭有水濁如泔不謂郡城東散步見湖潭入門便清奧恍如夢西南

泉源從高來候波走涵涵東去觸重阜盡為湖所貪但見蒼石螭開口吐清甘借汝腹中過胡為目眈眈新荷弄晚

涼輕棹極幽探飄飄忘遠近偃息遺佩蔘深有龜與魚淺
有螺與蚌曝晴復戲雨戢戢多于蠶浮沉無停餌倏忽遽
滿籃絲繆雖強致瑣紐安足戡聞昔周道興翠鳳棲孤嵐
飛鳴飲此水照影弄甃甃至今多梧桐合抱如彭聃翠羽
無復見上有鷗搏鷁嗟予生雖晚好古意所耽圖書已漫
漈猶復訪僑郊卷阿詩可繼此意久已含扶風古三輔政
事豈汝諳聊為湖上飲一縱醉後談門前遠行客劫劫無
留驂問胡不回首無乃趁朝參予今正疎懶官長幸見函
不辭日遊再行恐歲滿三暮歸仍
倒載鐘鼓已齧齧 已上鳳翔

臣謹案通志謂鳳翔東湖為雍渭二水所溢今攷雍水

在湖下流若渭水則相距甚遠無由溢入嘗閱宋蘇軾

詩泉源從高來隨波走涵涵東去觸重阜盡為湖所貪

今城西北有鳳凰泉繞城而流南合於塔寺河詳軾詩

意乃因泉水涓流匯而為澤軾詩又云聞昔周道興翠

鳳棲孤嵐飛鳴飲此水照影弄毳毳自注此飲鳳池也
益可見鳳泉之所瀦矣當日湖波潭影與輞水漾陂並
傳名勝歲久就堙舊有亭臺及軾祠宇亦多傾圯臣於
乙未春仲護送王師入蜀經歷鳳翔重加葺治剪伐灌
莽疏展湖身繞隄古柳數十株拔地參天真數百年物
四圍補植花竹映帶清流庶幾昔賢遺跡復還舊觀案
軾八觀詩一爲石鼓舊在縣南二十里石鼓原唐鄭餘
慶守鳳翔遷之孔廟軾時猶及見之大觀中移置汴梁
元皇慶二年復輦至大都今在國子監一爲詛楚文軾
詩自注碑獲於開元寺土下今在太守便廳案詛楚文

傳有數本今石碣均已湮沒一爲開元寺王維吳道子畫一爲天柱寺楊惠之塑維摩像二寺雖有其名不特畫壁塑像久而不存卽梵宇亦俱非舊制一爲李氏園一爲眞興寺閣問之山僧野老莫有知其故址者惟秦穆公墓在城中東南隅今置戶守冢而東湖尙爲岐下勝遊入觀陳迹遺留僅此而已

渭水在岐山縣南四十里自寶雞界流入又東入郿縣界水經注渭水自合磻溪水又東逕石原南又東逕五丈原北又東至郿縣

雍水在縣南十里自鳳翔界流入又東入扶風界水經注

雍水自合鄧公泉又東逕召亭世謂之樹亭川蓋邵樹聲

相近而誤耳又東南流與杜水合

謹案今雍水在岐山者俗名濰河一名後河至

扶風縣合漳水自下又通名爲漳水亦名白水皆卽雍水之誤也

斜水在縣南自褒城界流入又東北至郿縣界入渭史記
河渠書褒水通沔斜水通渭褒之絕水至斜間百餘里括
地志斜水出衙嶺山與褒水同源而派分通志桃川在縣
南百五十里其水出大山中流爲斜谷水逕太白峽斜谷
關北流入渭一名石頭河

杜水在縣南三里自鳳翔界流入合雍水水經注杜水東
南合漆岐二水俗謂之小橫水或名之米流川逕岐山西

又屈逕周城南謹案周城在縣東北又歷周原下自下亦名岐水又

東逕姜氏城南為姜水與雍水合九域志岐山縣有姜水

縣志自鳳翔界流來合潤德泉水又逕縣西有南寺溝水

自實相寺南流入之又入畝溝水自縣城北來流入之又

東南流會灘河為交河亦名雙溪謹案此水俗又謂之潢河即橫水之誤

漳水在縣東又東南合雍水流入扶風界漢書溝洫志關

中有漳渠如淳注漳水出漳谷元和郡縣志扶風縣南漳

川水近代譌作圍太平寰宇記源出縣東北六里漳谷東

縣志漳水一名白水亦名圍川唐以此名縣謹案縣東十里又有魯班

溝水二十里有龍尾漳水麻葉溝水俱以小水南流入于雍水案之亦即漳水也今俗間直以雍川當之府縣志並

承其誤者非

岐水在縣北源出麟遊普潤里東南流入漆

潤德泉水在縣西北十五里周公廟後蘇軾周公廟詩自

注廟後百許步有泉依山涌冽異常國史所謂潤德泉也

元一統志唐大中元年十月大風忽作飛泉噴湧節度使

崔琪上其事褒賜今名謹案崔琪碑正書今存又有元潤德泉碑至正二十五年立孔克任

文并書文及字體並雅合但誤指大中爲宋大中祥符則可哂耳建碑者卽邠國公李思齊也

斜谷河渠在縣南一百五十里一統志一名石頭河其水

灌田甲於他處已上岐山

雍水在扶風縣南門外自岐山界流入又東入武功界水

經注雍水自合姜水又東逕美陽縣之中亭川謹案美陽故城在縣北

美水在縣東十五里一名浪店溝通志源出美山逕美陽

故城至縣東浪店南入漳水謹案漢美陽縣在此水之北

時溝河在縣東十步俗亦指為漆水通志源出縣西北五

十里自岐山界龍泉寺流來至縣東門外合雍水謹案此水與麟游縣入小橫水之漆水別為一水

水與麟游縣入小橫水之漆水別為一水

鳳泉在縣東北五十里雍勝略在明月山西相傳文王時

鳳鳴岐山曾飲於此通志泉在天度鎮北十里其泉為瀦

水時或溢出檻外已復縮入有禱輒應人稱靈異已上扶風

渭水在郿縣北三里自岐山界流入又東入盩厔界水經注渭水東逕積石原又東逕五丈原北又東逕郿縣故城南又東逕武功縣北斜水自南注之又東逕馬冢北又逕武功縣故城北又東合雍水通志渭河自入縣界逕西磴汶家村又逕縣北東流過槐芽鎮柿林里至龍舞屯凡流七十五里出縣界

斜水在縣西南三十里與岐山接界漢書地理志武功縣斜水出衙嶺山北至郿入渭水經注斜水出武功縣西南衙嶺山北歷斜谷逕五丈原東以出武功縣亦謂之武功水其水北流注於渭通志斜谷河分導縣境者曰清水河

逕馬鞍山循紅崖東北流二十里入渭源微而委緩清澈可鑿故名其東導一派曰磨渠河逕景家橋與蒼龍谷水合亦曰蒼谷水東入乾溝河以在城南亦名南河

赤谷水在縣東二十五里縣志駱谷之東有赤谷水俗呼紅河源出太白湫名太白峽水自山巖噴飛而下出谷分三派其經河底注渭者曰洪溝河又名寧曲河其逕第二坡由教坊注渭者曰教坊河其逕馬頭原清澈里者曰清湫河北流二十里入渭又有黑谷水在赤谷水東出於滴水崖坪下有潭清澈見底再南卽四嘴山有白馬仰天池或曰卽谷水之源也北流入於清湫河

山河在縣東三十里清湫河東通志源發太白湫出潭谷口流二十餘里爲槐茅泉其水湍激西流注於渭

沙河在縣東通志大振谷水俗稱仙人峽水在湯谷東源出燕子窩北流二十里至睡佛寺與韋谷水合故名沙河亦名兩谷河

乾溝河在縣東五里通志其源有五一名五谷水一曰磨

石谷水出滴水崖合井索谷水水出觀音池逕曲兀堡合

萬戶谷水又逕西梁閣合桐谷水稍東又合駱谷水逕洪

寺谷合流紆曲餘四十里雨澇時五谷水皆會旱則絕流

故名乾溝

謹案此駱谷別是一水非蓋屋之駱谷水

鳳泉在縣東五十里唐書地理志郿縣有鳳泉湯通志隋

唐之鳳泉縣以此名

謹案鳳泉故城在縣東亦名溫泉俗名湯谷河

金渠在縣東南二十里通志引洪溝河水至寧曲堡寧曲

地皆砂石不能鑿井康熙八年鑿石開圳以通水路自寧

曲以上為居民食水自寧曲而下灌坂下田數百頃寧渠

民居成集遂興市集名曰金渠集

謹案寧曲為金渠之上流其源自金谷而來自

寧曲以上為居民食水以下為金渠灌溉田畝蓋因其地

多砂不能鑿井故引山水以資用耳渠有金興定五年重

修食水記碑高褒文張待舉書碑稱其地為濟相寧戚所開絕無依據不足信也

石麓廟渠在縣南三十里通志引斜谷關水以達于石麓

廟堡之前後左右分為四渠頗資灌溉

已上郿縣

渭水在寶鷄縣南一里自隴州流入又東入岐山界水經
注渭水東與楚水合又東入散關又東逕西武功北與扞
水合又東右合南山五溪水諸澗流注之又東逕陳倉縣
西陳倉水東南注之又東與綏陽溪合又東逕郁夷故城
南汧水入焉渭水之右磻溪水注之又東逕石原謹案西武功故
城在縣西南又案太平寰宇記郁夷故城在隴州西
則渭水不應逕陳倉而復逕郁夷也疑傳寫之誤

楚水在縣西二十五里水經注楚水南流逕長蛇戍又南

流注于渭通志今名陸川亦曰長蛇水

扞水在縣西南十五里自鳳翔界來東北流入于渭水經

注扞水經故道縣西又東北歷大散關入渭謹案故道縣今屬鳳縣

五溪水在縣南五里東北流入渭通志一名清澗河在縣西南七十里出煎茶坪山頂懸流如布又名瀑布泉

陳倉水在縣東南二十里水經注陳倉水出陳倉山下東北流注於渭

北流注於渭

汧水在縣東三十里自汧陽界流入又東南入渭水經注

汧水逕郁夷縣又逕平陽故城南又東流注於渭水謹案平陽

故城今屬岐山縣通志一名汧陽河出隴州北境東南流六十里

入渭

綏陽水在縣東南六十里源出南山北流入渭水經注綏

陽溪水上承斜谷自斜谷分注綏陽溪北至陳倉入渭

箕谷水在縣東南六十五里源出箕谷北流三里入渭通志蜀漢建興六年諸葛亮以大兵出祁山揚聲由斜谷道取郿使趙雲鄧芝爲疑兵據箕谷有箕谷水出焉又溫山谷亦在縣東南四十里溫水出焉北流入渭

故道水在縣西南五十餘里又西南流逕黃牛堡入鳳縣界水經注故道水出陳倉之大散嶺西南逕故道縣

金陵河在縣東五里源出五峯山南流入渭通志在渭水北自隴州流入縣境又南逕陵原入渭

虢川在縣東南百五十里太平寰宇記虢縣有桃虢川路通漢中通志虢川水源出奧山下北流十里又折而西流

六十里逕進口關入鳳縣界謹案此即鳳縣之紫金水源

茲泉在縣東南八十里即磻溪水呂氏春秋太公釣於茲

泉水經注磻溪水出南山茲谷乘高激流注於溪中溪中

有泉謂之茲泉泉水潭積自成淵渚今人謂之几谷東南

隅有石室蓋太公所居也水流次平石釣處即太公垂釣

之所也其投竿跪餌兩膝遺跡尚存其水清冷神異北流

十二里注於渭括地志慈泉出岐山縣西南几谷謹案慈與茲同

通志一名璜河在渭水南源出秦嶺北流五十里入渭唐梁

肅磻溪銘至人無心與道出處處則土木出則雷雨惟殷道絕粵有尚父爰宅于幽盤桓草莽天地闔闢陰陽運行

明極而昏昏極而明遇主水濱謀秦八紘牧野桓桓一麾而平惟彼日月得天而光惟彼聖賢得時而彰獨夫昏迷

我乃豹藏文武作周我乃鷹揚故曰大道無體大人無方
運用變通至虛而常作銘磻溪今古茫茫宋蘇軾磻溪石
詩墨突不暇黔孔席未嘗暖安知渭上叟跪石留雙鬣一
朝嬰世故辛苦平多難亦欲就安眠旅人譏客懶又禱雨
磻溪詩龕燈明滅欲三更欹枕無人夢自驚深谷留風終
夜響亂山銜月半床明故人漸遠無消息古寺空來看姓
名欲向磻溪問姜叟
僕夫屢報斗杓傾

阿谷泉在縣東五里西平原之麓通志其水清冽禱祀靈
應號爲神泉

玉女潭在縣西南二十五里玉女祠下一統志五代時蜀

將安思謙敗漢兵處

已上寶雞

汧水在汧陽縣南一里自隴州流入又東南逕鳳翔界入
寶雞界水經注汧水自會吳山水又東南逕隄麋縣故城

又東南歷慈山逕郁夷縣

謹案隃麋故城在縣東又案故郁夷縣及慈山今俱屬隴州

通志汧水合暉河逕縣東至清宮前有石峽對鎖每逢霖雨水發則波勢洶湧轟若雷霆謂之大石門又東一里許爲小石門或傳大禹導汧入渭所鑿也

隃麋澤在縣東八里元和郡縣志漢以此名縣通志其地近水宜秔稻

草壁谷溪在縣西三十里通志其北有石魚溝舊有石魚神廟相傳溝內有石欲取者虔禱剖石則兩片皆有魚形否則不全其水流入草壁溪南流六十里入汧

珍珠泉在縣南三里通志一名吐珠泉在三泉鄉其泉自

山罅迸出清冽較勝諸水相傳飲此可以消癭
暉川河在縣西通志源出馮坊里爲北山之水所聚勢極
猛迅南流七十里入於汧

汧水渠在縣界通志在北岸掘引灌田者凡十有四屈家
灣渠在縣西四十五里又東爲草北鎮渠在縣西三十五
里又東爲羅家店渠在縣西二十五里又東爲葫蘆鋪渠
在縣西二十三里又東爲寇家河渠在縣西二十里又東
爲新興鋪渠在縣西十五里又東爲段坊渠在縣西十里
又東爲毘盧寺渠在縣西五里汧水逕縣西關外又逕縣
城南至縣東關外爲玉清宮渠在縣東二里又東爲小石

門渠在縣東三里又東爲五里鋪渠在縣東五里又東爲龍泉里渠在縣東十里又東爲高崖村渠在縣東二十里又東爲黃里鎮渠在縣東二十五里其在南岸者凡十有二首爲乾河灘渠在縣西四十五里又東爲安化村渠在縣西三十五里又東爲水磨溝渠在縣西三十二里又東爲馬家村渠在縣西三十里又東爲埭底村渠在縣西二十五里又東爲古跡溝渠在縣西二十里又東爲朱坊堡渠在縣西十里又東爲上下馬家灘渠在縣西五里又東爲小石門渠在縣東三里與北岸小石門渠相對舊立閘於此以防水漲又東爲段家灣渠在縣東十里又東爲鄒

家莊渠在縣東二十里又東爲峯臺山根渠在縣東二十

五里凡灌田四千餘畝

已上
沂陽

漆水在麟遊縣西東南流入岐山縣界詩周頌猗與漆沮

毛傳漆沮岐周之二水山海經掄次之山漆水出焉郭璞

注漆水出岐山漢書地理志右扶風漆縣漆水在縣西

謹案

漆縣故城在縣西十三州志漆水出漆縣西北至岐山東入渭水

經注漆水出杜陽縣之漆溪謂之漆渠漆渠水南流大轡

水注之二川并逝俱爲一水南與杜水合

謹案杜陽故城即今治

元

和郡縣志普潤縣城西有漆水

謹案普潤故城在縣西

太平寰宇記

漆水源出普潤縣東南漆溪通志源出縣西南百二十里

舊普潤縣西之青青山合岐水入渭雍錄岐之與邠固皆同隸漢世漆縣然漢志漆水特一出無兩漆也元和郡縣志務合鄭說遂分漢志一漆而著諸兩縣故普潤新平皆有漆水仍於新平立之說曰漆水在縣西九里西流注乎涇今麟遊亦有漆水與此異据此不獨一漆分爲兩漆而意指所向正謂邠州漆水應經而岐下漆水不與經應也夫漢志但著一漆而吉甫直以邠漆爲漆不以岐漆爲漆則酷信康成之過也通志鄭氏綿詩注云公劉遷豳居漆沮之地故元和志謂邠州之漆別爲一水入涇寰宇記亦以白土川當之元和志又云隋置普潤屯後廢屯立縣在

漢爲漆地亦明指普潤爲卽漆縣矣大昌之辯似不爲無見

臣謹案元和郡縣志謂漆水有二綿詩之漆在邠之新平不在岐之普潤其說是也程大昌謂不當以一漆而著諸兩縣陝西通志辯之然其語意亦似謂普潤新平只一漆水不知入渭入涇自有兩水不可混合臣嘗考之綿一章言公劉居豳卽著沮漆之水二章乃言古公遷岐然則綿詩之漆安得謂其在岐而不在邠乎元和郡縣志謂新平縣西九里有漆水北流入涇禹貢錐指謂涇水今自邠州北東南流入永壽界漆水北流必注

於涇是邠州漆水不特與綿詩合亦卽禹貢漆沮旣從之漆水太平寰宇記以白土川當之是也然其謂恐是漢之漆水則又不然蓋漢志漆水以十三州志攷之當是入渭之水班固言漆水在漆縣西今漆縣故城在麟遊樂史乃謂今麟遊縣東南有漆水南流與杜陽水合非漢之漆水其說正與班志相背臣竊以爲白土川或謂之漆水此綿詩及禹貢之漆也許慎說文漆水出右扶風杜陽岐山東入渭乃是漢志之漆如此分屬庶不歧誤若其在耀州富平者源出同官又是一水與此兩漆水皆無涉也

岐水在縣西淮南子岐水出石橋山東南流論衡王季葬於滑山之尾欒水齧其墓水經注大欒水出杜陽縣西北大道川東南流入漆卽故岐水也隋書地理志普潤縣有岐水太平寰宇記岐水卽大欒水也源出普潤縣東南流入漆水

杜水在縣南城下東南流入乾州界漢書地理志杜陽縣有杜水南入渭顏師古注詩曰民之初生自土沮漆齊詩作自杜言公劉居杜與沮漆之地水經注水發杜陽縣大嶺側世謂之赤泥峴沼波歷澗俗名大橫水疑卽杜水矣其水東南流逕杜陽故城世謂之故縣川二坑水注之水

有二源一水出西北與瀆魑水合而東歷五將山又合鄉谷水水出鄉溪東南流入杜水謂之鄉谷川杜水又南合莫水隋書地理志普潤有杜水太平寰宇記杜水源出普潤縣東南溪澗間通志杜水出縣西五十里招賢鎮杜山之陰行石澗中東南流至舊九成宮西納鳳臺北西海口一帶之水而流始大蓋西海口納良舍西坊兩流也又東納清水河一帶之水而其流愈大杜水又接排雲殿山細流而東逕縣南北受通濟橋五龍泉和尚泉等水又東則南受馬家溝口水又東折逕火星廟北過峽東轉合於澄水縣治居杜澄二水之中復折而過慈禪寺受石白山史

家河一派再折至柴石山後受吳雙以北之水而可以勝舟矣又數折北受縣東之尉遲澗水又受小花石溝水而其勢益大出縣境逕乾州又至武功入渭

二坑水在縣西十里通志合青蓮山箭括山下兩流北流

入杜水

謹案今俗名清水河

鄉溪水在縣東城下通志合清蓮名里納北來嶺西河四郎廟峽內諸水東南入杜水今名澄水

細川谷水在縣西太平寰宇記細川谷水在普潤縣南北流入涇州界一統志後魏永安中高平賊帥万俟醜奴散營於岐州之北百里細川卽此

五龍泉水在縣西南流入杜水通志水味作酒異常宋熙

寧中王竦爲記立石今不存

謹案王竦宋時縣令見萬年宮銘刻石額

玉女潭在縣西南十五里名山記俗傳唐武后避暑九成宮時浴此

醴泉在縣西五里唐魏徵醴泉銘序貞觀六年帝避暑九成宮歷覽臺閣閑步西城躊躇高閣之下俯察厥土微覺有潤因以杖導之有泉隨而涌出乃承以石檻引爲一渠味甘若醴雍勝略泉在九成宮中

已上麟遊

渭水在隴州南一百四十里自秦州清水縣入境又東入寶鷄界水經注渭水東南出石門度小隴山逕南由縣南

東與楚水合又東入散關元和郡縣志渭水在南由縣南四十里太平寰宇記渭水在隴安縣西南四十五里

汧水在州南又東南流入汧陽界史記秦本紀周孝王使非子養馬於汧渭之間漢書地理志汧縣汧水出西北入渭續漢書郡國志汧水出汧山水經注汧水出汧縣之蒲谷鄉強中谷爾雅曰水決之澤爲汧汧之爲名實兼斯舉水有二源一水出縣西小隴山其水東北流歷澗注以成淵潭漲不測出五色魚俗以爲靈莫敢採捕因謂是水爲魚龍水自下亦通謂之魚龍川川水東逕汧縣故城北又東歷澤亂爲一右合龍泉又東會一水自水會上下咸謂

之魚龍川隋書地理志汧陽縣有汧水括地志源出汧陽
縣西南汧山東入渭錄異記隴州路七十餘里有洞中有
石或大或小隨水流出破之皆有魚龍形過者並不敢語
語者便聞風雷之聲通志汧河源出汧山東流會北河東
南入汧陽界濱水之地自州西至汧陽寶鷄幾二百里謂
之汧川唐許棠汧湖詩偶得湖中趣都忘隴坻愁邊聲風
下雁楚思浪移舟靜極亭連寺涼多島近樓吟遊
終不厭還
似曲江頭

楚水在州西南山海經數歷之山楚水出焉而南流注於
渭水經注楚水世所謂長蛇水出汧縣之數歷山南流逕
長蛇戍東又南注於渭闕駟以是水爲汧水元和郡縣志

長蛇川在南由縣西百步通志在吳山縣舊境內其流委曲如蛇後魏以此名縣

芮水在州西北周官職方氏其川涇芮漢書地理志芮水出西北東入涇顏師古注詩芮鞫之卽韓詩作芮阮水經

注芮水出小隴山

謹案隴州之水凡出吳山及弦蒲者不入于渭卽入于汧並無入涇之水蔡沈

書傳以爲汭水出弦蒲汭卽芮也元和郡縣志汭水出涇州良原縣一名宜祿川西自華亭縣流入至長武入涇則與漢志所云合與書傳所云異矣

白環谷水在州西九域志吳山縣有白環水金史地理志汧源縣有白環水雍大記白環谷白環水所出通志水流如環故名

入渡河在州東南水經注汧水有二源一水發南山西側

山下石穴廣四尺高七尺水溢石穴懸波側注發源成川

北流注於汧州志一水發源望輦峯左旋繞廟前東北流

入汧水

謹案水經注云汧水有二源一水出縣西山一水發南山西側則二源皆汧水也本文甚明自昔人

誤謂一水為水名而不察汧有二源之語遂呼為一水其謬甚矣今特為正之

龍泉在州東四十里水經注汧水右合龍泉泉徑五尺源

流奮通淪漪四泄東北流注於汧通志龍泉在州東南梨

林州水出如注汚之即涸一名白龍泉今日金泉

丹泉在州東二里雍勝略在谷神觀東

弦蒲藪在州西二十里周官職方氏其澤藪曰弦蒲鄭康

成注弦蒲在汧鄭司農云弦蒲或爲汧蒲水經注汧水出
蒲谷鄉弦中谷決爲弦蒲數九域志汧源縣有弦蒲數明
一統志弦蒲數在州西四十里已上隴州

關中勝蹟圖志卷十七終

關中勝蹟圖志卷十八

兵部侍郎兼都察院右副都御史陝西巡撫畢沅纂

古蹟 宮闕

鳳翔府殷岐陽宮在岐山縣東北五十里雍勝略卽周太
王由邠遷岐所建今宮廢而土人尤稱之

秦平陽封宮在郿縣故平陽城內史記秦本紀武公元年
伐彭戲氏至於華山下居平陽封宮郊祀志雍大雨壞平

陽宮垣

謹案張守節正義云宮在岐州平陽城內然則此華山非太華山矣雍錄之說甚誤故不載

羽陽宮在寶雞縣陳倉故城內漢書地理志羽陽宮秦武
王起澗水燕談錄秦武公作羽陽宮在寶雞縣界歲久不

可究知其處元祐六年正月直縣門之東百步居民權氏濬池得古銅瓦面上隱起四字曰羽陽千歲篆字隨勢爲之不取方正始知爲羽陽舊址也其地北負高原南臨渭水前附羣峯形勢雄壯眞勝地也

大鄭宮在鳳翔縣南七里杜預左傳注有古雍城秦德公所居大鄭宮城也史記秦本紀德公元年初居雍城大鄭宮

起
高泉宮在扶風縣東美陽故城中漢書地理志秦宣太后

起
虢宮三輔黃圖秦宣太后起在岐州虢縣界

棫陽宮在扶風縣東北三十里漢書地理志棫陽宮昭王

起

謹案長安志亦謂棫陽宮為秦昭王起獨雍勝略以為穆公建未識何所據今不錄

祈年宮在鳳翔府城內東南隅漢書地理志祈年宮惠公

起橐泉宮孝公起三輔黃圖斬年宮穆公造

謹案斬與祈同水經

注雍縣中罕

謹案罕與罕同

并秦惠公故居所為祈年宮也孝公

又謂之橐泉宮雍錄據酈此言則是惠公所都雍縣有祈

年宮至孝公命為橐泉名雖兩處其實一宮也雍勝略後

人於此建祈年觀

漢回中宮在鳳翔縣三輔黃圖回中宮在汧括地志回中

秦故宮在雍州西四十里

隋仁壽宮在麟遊縣西五里通鑑文帝詔楊素營仁壽宮於岐山之北素奏宇文愷封德彝爲土木監於是夷山堙谷以立宮殿崇臺累榭宛轉相屬有大寶殿隋書文帝本紀在仁壽宮

岐陽宮在鳳翔縣城內通志開皇六年建

安仁宮在郿縣東隋志郿縣有安仁宮開皇十五年置行宮十二所自京師以達仁壽宮此其一也

唐九成宮在麟遊縣西五里唐書地理志本隋仁壽宮貞觀五年更名永徽二年曰萬年宮乾封二年復曰九成宮周垣千八百步並署禁苑及府庫官寺元和郡縣志每歲

避暑春往冬還義寧元年廢宮置郡縣貞觀五年復修舊

宮以爲避暑之所故名九成舊唐書高宗本紀咸亨四年

九成宮太子新宮成上召五品以上宴極歡而罷縣志宮

在縣西天臺山上中有碧城及排雲御容等殿唐李子卿駕幸九成

宮賦皇帝握靈符之三載也天地穆清星日耀潤野訪遺逸

秋彌之禮順思訪俗而觀人若乘乾而出震右輔伊邇離宮

之洲渚岐山雲物落禁裏之軒墀俄而迴鑾輅載羽旗爲宴

哉由是叶清秋練吉日乘石洗皇輿出七驪按隊千乘扈蹕

然而八駿賽騰霍漢而六龍奔逸雷公轉轂風伯按馭朱旗

秦皇之逸豫祥烟不散近飛槍壘之間瑞草常開併拂車宮

關中叢書卷十八

難成王之蒐由是問古公之政有以觀翠華來兮野老喜
屬車至今國人歡詎比夫隴塞回中妄開行幸之路泰郊
時上虛立禮神之壇穆然深宮駐蹕其中樓枕嶺而倒影
殿當川而抱虹閼邃而寒暑隔峇堯而雲霧通前視八水
旁臨九峻所以明四目達四聰凝睿想播元風比遊心于
汗漫侔得道于崆峒亦既下輦於是端冕補闕政修墜典
大風之歌作湛露之恩展于是振旅建旄迴鑾返轡百蠻
懼威武萬姓知教義若臣者巖穴久服邱園來賁未有燭
於皇明竊以覩于人瑞敢獻楊雄之賦庶獲有司之議魏
徵九成宮醴泉銘維貞觀六年孟夏之月皇帝避暑乎九
成之宮此則隋之仁壽宮也冠山構殿絕壑爲池跨水架
楹分巖竦闕高閣周建長廊四起棟宇膠葛臺榭參差仰
視則迢遰百尋下臨則崢嶸千仞珠壁交映金碧相輝照
灼雲霞蔽虧日月觀其移山迴澗窮泰極侈以人從欲良
足深尤至於炎景流金無鬱蒸之氣微風徐動有淒清之
涼信安體之佳所誠養身之勝地漢之甘泉不能尚也皇
帝爰在弱冠經營四方逮乎立年撫臨億兆始以武功一
海內終以文德懷遠人東越青邱南踰丹徼皆獻琛奉贄
重譯來王西暨輪臺北距元闕並地列州縣人充編戶氣
淑年和邇安遠肅羣生成咸遂靈貺畢臻雖藉二人之功終

資一人之慮遺身利物櫛風沐雨百姓爲心憂勞成疾同
堯肌之如臘甚禹足之胼胝針石屢加賤理猶滯爰居京
室每弊炎暑羣下請建離宮庶可怡神養性聖人愛一夫
之力惜十家之產深閑固拒未有俯從以爲隋氏舊宮營
于曩代棄之則可惜毀之則重勞事貴因循何必改作于
是斲雕爲樸損之又損去其太甚葺其頽壞雜丹堦以砂
礫間粉壁以塗泥玉砌接於土階茅茨續於瓊室仰觀壯
麗可作鑒於旣往俯察卑儉足垂訓於後昆此所謂至人
無爲大聖不作彼竭其力我享其功者也然昔之泚沼咸
引谷澗宮城之內本乏水源求而無之在乎一物旣非人
力所致聖心懷之不忘粵以四月甲申朔旬有六日己亥
上及中宮歷覽臺觀閑步西城之陰躊躇高閣之下俯察
厥土微覺有潤因而以杖導之有泉隨而涌出乃承以石
檻引爲一渠其清若鏡味甘如醴南注丹青之右東流度
於雙闕貫穿青瑣縈帶紫房激揚清波滌蕩瑕穢可以導
養正性可以激營心神鑒映羣形潤生萬物同湛恩之不
竭將元澤之常流匪惟乾象之精蓋亦坤靈之寶謹案禮
緯云王者刑殺當罪賞錫當功得禮之宜則醴泉出於闕
庭鵲冠子曰聖人之德上及太清下及太寧中及萬靈則
醴泉出瑞應圖曰王者純和飲食不貢獻則醴泉出飲之

令人壽東觀漢記曰光武中元元年醴泉出於京師飲之者痼疾皆愈然則神物之來實扶明聖既可蠲茲沉痾又將延彼遐齡是以百辟卿士相趨動色我后固懷撝挹推而弗有雖休弗休不徒開於往昔以祥爲懼實取驗於當今斯乃上帝元符天子令德豈臣之未學所能不顯但職在記言屬茲書事不可使國之盛美有遺典策敢陳實錄爰勒斯銘其詞曰惟皇撫運奄壹寰宇千載膺期萬物斯覩功高大舜勤深伯禹絕後光前登三邁五握機蹈矩乃聖乃神武克禍亂文懷遠人書契未紀開闢不臣冠冕並龔琛贄咸陳大道無名上德不德元功潛運幾深莫測鑿井而飲耕田而食靡謝天功安知帝力上天悅載無臭無聲萬類資始品物流形隨感變質從德效靈介焉如響赫赫明明雜遯景福葳蕤繫社雲氏龍官龜圖鳳紀日含五色烏呈三趾頌不輟工筆無停史上善降祥上智斯悅流謙潤下潺湲皎潔萍旨醴甘冰凝鏡澈用之日新挹之無竭道雖時泰慶與泉流我后夕惕雖休勿休居崇茅宇樂不般遊黃屋非貴天下爲憂人玩其華我取其實還淳反本代文以質居高思墜持滿戒溢念茲在茲永保貞吉高宗萬年宮銘並序朕聞金臺迢遞超忽崑閩之間玉闕參差綿邈蓬瀛之際是以周王肆轍唯招旣往之僭漢帝遐

遊空益將來之弊豈如岐陽峻阜鎮茲京甸疏林光之列
館建甘泉之離宮東望翦華千林結影西瞻隴阪派水分
流南俯茶源風雲交暎北臨石柱川岳朝宗迴迴孤峯秀
三襲于霞表斜斜危路環九折於雲心復澗澄陰扇炎風
而變冷重巒潛暑韜夏景而凝寒故知五鎮之基空號神
州之地三仙之嶺虛傳靈府之都未若翦裁石宮構飛檐
於迴漢騰虛架宇聳紫殿於遙空百仞朱樓月盈虧于青
璣千尋翠閣雲舒卷於丹墀岫綴霞衣點虹梁而散錦巖
飛溜帶潛石砌而成冰浮涼氣於彤闈庭留花而雪夏凝
清陰于碧沼池結鏡而冰春泉起花岑沁數峯而吐秀波
搖錦石皎兩鏡而騰暉幾片斷雲縈松合蓋數聚幽桂極
月分香溟壑棲烟叢千疇而散碧朝原旭日輝四野而舒
紅笑樹餘花低空落影吟風宿鳥響答雙嬌鶯不恨而恆
啼蝶無情而起舞朕感懷千古流鑒百王思欲屏逸收驕
怡神遣慮空峒訪道欽往哲之高風姑射尋真挹前修之
徽步所以停軒禁籞駐蹕榆川非欲賞恣盤遊途窮轍返
加以時侵首夏汎蕩餘春露泣修篁風清邃澗薜蘿雲起
騰鳶星懸可以陶瑩心靈澄清耳目鏡冰霜則廉潔斯在
撫松筠則貞操非遙昔姬后西征尤刊弁石秦皇東指尚
勒稽峯况勝地追遊何必華胥之國蕭然物外不假元圖

之阿故叨美千齡騰輝萬古景其前躅爰茲其地其銘曰
靈山作鎮結秀岐陽遠圖石柱迥據瑤房鶯驕淑氣花泣
韶光樹含冬暖巖留夏霜構宇重巘裁基壘岫石砌被錦
山牕點繡口小蘭新峯殘蓮舊雪徑累花冰溪恆晝標途
天外聳闕雲端烟霾邃谷霧失鳴湍彤闈潛暑翠幌凝寒
憩駕離宮淹留禁苑口柳初眉細潭深鏡遠蓋逐雲穿苔
隨口葉冷帷秋口濃口晚泉飛嶺腹景鏤巖心霞疎錦溥
草密袍深露荷傾玉風螢散金檐空鵲靜山昏日沉邱壑
怡神林篁賞性千里眺監八州口鏡玉燭調序薰琴動詠
仰則口山刊規遠映劉禕之九成宮秋初應詔詩帝圃疏
金闕仙臺駐玉鑿野分鳴鸞岫路接寶雞壇林樹千霜積
山宮四序寒蟬急知秋早鶯踈覺夏闌怡神紫氣外凝睇
白雲端舜海祠波發空驚遊聖難李嶠夏晚九成宮呈同
寮詩碣館分襄野平臺架射峯英藩信煒燁勝地本從容
林引梧庭鳳泉歸竹沼龍小軒恆共處長坂屬相從野席
蘭琴奏山臺桂酒濃一枰移晝景六著盡宵鐘枚藻清詞
律鄒談耀辯鋒結歡良有裕聯寤媿無庸暫悅邱中賞還
希物外蹤風烟遠近至魚鳥去來逢月澗橫千丈雲崖列
萬重樹紅山果熟崖綠水苔濃願以西園柳長間北岸松
杜甫九成宮詩蒼山如百里崖斷如杵白曾宮憑風回岌

業土囊口立神扶棟梁鑿翠開戶牖其陽產靈芝其陰宿
牛斗紛披長松倒揭巉怪石走哀援啼一聲客淚迸林藪
荒哉隋家帝製此今頽朽向使國不亡焉為巨唐有雖無
新增修尚置官居守巡飛瑤水遠迹足雕牆後我行屬時
危仰望嗟歎久天王守太白駐馬更搔首李商隱九成宮
詩十二層樓闋苑西平時避暑拂虹霓雲隨夏后雙龍尾
風逐周王八駿蹄吳岳曉光連翠巘甘泉晚景上丹梯荔
枝盧橘沾恩幸鸞鵲天書濕紫泥李甘九成宮詩中原無
鹿海無波鳳輦鸞旗出幸多今日故宮歸寂寞太平功業
在山河吳融過九成宮詩玉輦東歸二百年九成宮殿半
荒阡魏公碑字封蒼蘚文帝泉聲落野田碧草斷霑仙掌
露綠楊猶憶御爐烟昇平舊事無人說萬疊青山但一川
謹案醴泉銘貞觀六年四月立歐陽詢正書萬年宮銘永
徽五年五月立高宗正書其陰令從臣自中書門下及文
武三品以上自
書名位刻之

永安宮在麟遊縣西唐書地理志九成宮西三十里有永

安宮貞觀八年置

已上
宮闕

古蹟苑囿附
第宅

鳳翔府周尹喜故宅偃曝餘談寶雞縣有尹喜故宅張三
豐邱長春馬丹陽王重陽劉綱樊夫人秦弄玉仙跡往往
而在

唐李茂貞園在鳳翔縣東北五里通志光啓中茂貞節度
鳳翔時建修竹萬竿內有竹閣旁引溪水灌之宋蘇軾李氏園詩朝

遊北城東回首見修竹下有朱門家破牆圍古屋舉鞭叩其戶幽響答空谷入門所見夥十步九移目異花兼四方野鳥喧百族其西引溪水活活轉牆曲東注入深林深深窗戶綠水光兼竹淨時有獨立鵠林中百尺松歲久蒼鱗簇豈惟此地少意恐關中獨小橋過南浦夾道多喬木隱如城百雉挺若舟千斛陰陰日光淡黯黯秋氣蓄盡東爲方池野雁雜鴻鶩紅梨驚合抱映島孤雲馥春光水溶漾雲陳風翻撲其北臨長溪波聲卷平陸北山臥可見蒼萃

間曉禿我來時周覽問此誰所築云昔李將軍負險乘衰
叔抽錢算閒口但未榷羹粥當時奪民田失業安敢哭誰
家美園圃籍沒不容贖此亭破千家鬱鬱城之麓將軍竟
何事蠅虱生刀韞何嘗載美酒來此駐車轂空使後世人
聞名頸猶縮我今官正閒屢至因休沐人生營
居止竟爲何人卜何如辦一身永與清景逐

汧陽閣在汧陽縣治南唐韋莊汧陽閣詩汧水悠悠去似
紆遠山如畫翠眉橫僧尋野渡歸

吳嶽雁帶斜陽入渭城邊靜不收蕃帳馬地貧惟
賣隴山鸚牧童何處吹羌笛一曲梅花出塞聲

宋會景亭在鳳翔縣城外一統志南溪處衆亭之間蘇軾

遷之水西可以遠眺又改名招隱題詩其上宋蘇軾會景
亭詩飛簷臨

古道高榜勸遊人未卽令公隱聊須口路塵茅茨分聚落
烟火旁城闈林缺湖光滿牕明綠野新居民惟白帽過客
漫朱輪山好留歸騎風迴落醉巾他年誰改
築舊製不須因再到吾雖老猶堪作坐賓

喜雨亭在鳳翔縣東北通志蘇軾判郡時建蘇軾喜雨亭
記亭以雨名

志喜也古者有喜則以名物示不忘也周公得禾以名其書漢武帝得鼎以名其年叔孫勝狄以名其子其喜之大小不齊其示不忘一也余至扶風之明年始治官舍爲亭于堂之北而鑿池其南引流種樹以爲休息之所是歲之春雨麥於岐山之陽其占爲有年旣而彌月不雨民方以爲憂越三月乙卯乃雨甲子又雨民以爲未足丁卯大雨三日乃止官吏相與慶於庭商賈相與歌於市農夫相與忭於野憂者以喜病者以愈而吾亭適成於是舉酒於亭上以屬客而告之曰五日不雨可乎曰五日無雨則無麥十日不雨可乎曰十日不雨則無禾無麥無禾歲且薦饑獄訟繁興而盜賊滋熾則吾與二三子雖欲優遊以樂於此亭其可得耶今天不遺斯民始旱而賜之以雨使吾與二三子得相優遊以樂於此亭者皆雨之賜也其又可忘耶旣以名亭又從而歌之曰使天而雨珠寒者不得以爲襦使天而雨玉饑者不得以爲粟一雨三日伊誰之力民曰太守太守不有歸之天子天子曰不然歸之造物造物不自以爲功歸之太空太空冥冥不可得而名吾以名吾亭

斯飛閣在寶雞縣西南

宋蘇軾斯飛閣詩西南歸路遠蕭條依檻魂飛不可招野闊牛羊同

鴈鷺天長草樹接雲霄昏昏水氣浮山麓汎汎春風弄麥苗誰使愛官輕去國此身無計老漁樵

翠麓亭在寶雞縣東南一百八十里通志在青峯寺旁

石林亭在麟遊縣東一統志宋劉敞詩蘇軾和之宋劉敞石林亭

詩朝廷入忘返山林往不還念無高世資聊處可否間築基傲崔嵬鞭石輕險艱羣玉相磊落萬峯正孱顏種樹亦蒼蒼激流復潺潺渴活歛在眼崑閩若可攀自我嬰世網爾來鬢毛班邱壑誠若喪簿書常自環及爾滅聞見曠如遠塵寰豈敢同避世庶幾善閑關子牟固懷魏謝傳悲阻山茲焉可怡老詎厭終歲閑蘇軾和石林亭詩都城日荒廢往事不可還惟餘故苑石飄散向人間公來始購蓄不憚道里艱盡從塵埃中來對冰雪顏瘦骨拔凜凜蒼根漱潺湲唐人惟奇章好石古莫攀盡令屬牛氏刻鑿紛班班嗟此本何常聚散實循環人失亦人得要不出區寰君看劉季末不能愛河關况此百株石鳴毛與泰山但當對石飲萬事付等閑謹案此詩亭有刻石為李邵正書嘉祐

七年立

張橫渠宅在郿縣東五十里一統志今名橫渠鎮在大振谷口

古蹟祠宇

上古黃帝子祠在汧陽縣西漢書地理志隃糜縣有黃帝子祠黃帝孫祠在寶雞縣北漢書地理志陳倉縣有黃帝孫祠

夏禹廟在岐山縣東十三里一統志有古柏四十九株枝悉西向

姜嫄祠在郿縣棗亭水經注棗縣故城東北有姜嫄祠西南百步有后稷祠

周周公廟在岐山縣西北十五里鳳凰山麓雍勝略舊有

泉久竭唐宣宗大中中忽有五泉涌出賜名潤德泉續文

獻通考元文宗天歷二年建周公廟於鳳翔岐山之陽春

秋祭奠如孔子廟儀一統志有姜嫄廟在廟後宋蘇軾周公廟詩吾

今那復夢周公尚喜秋來過故宮翠鳳舊依山突兀清泉長與世窮通至今遊客傷離黍故國諸生詠雨濛牛酒不

來烏鳥散白楊無數暮號風謹案廟有大中二年十二月周公祠靈泉碑及題奏狀並勅批答刻石

磻溪神祠在寶雞東南六十里磻溪側水經注即太公釣

所石壁高深幽篁邃密人跡罕交東南隅有石室蓋太公

所居

玉女祠在鳳翔縣南五十里太平寰宇記秦穆公弄玉鳳

臺之地也

老子廟在寶雞縣大散關上水經注散關有老子廟

陳寶祠在寶雞縣東二十里史記秦本紀秦文公獲若石

於陳倉北阪城祠之祠以一牢命曰陳寶水經注陳倉縣

有陳寶雞鳴祠列異傳秦穆公時謹案括地志諸書並作文公獨此作穆公陳

倉人掘地得物若羊非羊若猪非猪牽以獻穆公道逢二

童子曰此為媪述謹案太康地志作此名為媪媪媪聲相轉臣瓚史記注云陳倉縣有寶夫人祠

歲與葉君神會當即此常在地中食人腦若欲殺之以柏插其首媪

曰此二童子名為寶雞得雄者王得雌者霸陳倉人舍之

逐二童子化為雉飛入於林陳倉人告穆公發徒大獵得

其雌又化爲石置之汧渭之間至文公立祠名陳寶縣志
祀鷄臺址今尙存

汧水祠在隴州西四十里漢書地理志郁夷縣有汧水祠
太平寰宇記今州西大寧閣側近汧水因水置祠

漢張魯女祠在隴州東二十里太平寰宇記故老相傳云
漢張魯女死於此時人爲立祠民禱有驗謹案張魯女死處在城固寰宇

記之說未知何所本姑附於此

魏鄧艾祠在鳳翔縣北十里水經注鄧公泉出鄧艾祠北
隋文帝廟在扶風縣東四十五里揮麈前錄隋高祖廟以
牛宏高頴賀若弼配祀

西鎮吳山廟在隴州南七十里吳嶽山下隋書禮儀志開
皇十六年正月準西鎮吳山造神廟冊府元龜清泰元年
正月壬申詔吳嶽成德公可進封靈應王其祠宇宮屬並
同五岳初帝在鳳翔遣房暘祀之有應至是欲加封爵下
有司簡討奏天寶十載正月封吳山神爲成德公至德二
年十二月改吳山爲嶽祠享宮屬視五嶽今國家以靈告
祥宜示殊等故有是命宋史禮志開寶六年遣使奉衣冠
劍履送西鎮吳嶽廟立秋日記西鎮吳山於隴州舊封成
德公元豐八年封王謹案清泰中已封王志說未是元史祭祀志大德二
年二月加封吳山爲成德永靖王至元三年定歲祀嶽鎮

之制七月土王日祀吳山於隴州界續文獻通考明洪武

三年詔嶽鎮海瀆英靈之氣受命上帝豈國家封號可加

命依古制止以山水本名稱西鎮吳山之神十二年遣官

賜金香盒一座有司祭服二襲永樂二年勅修五年重建

通志本朝康熙四十二年五月欽頒匾額曰五峯挺秀每

歲春秋令有司致祀宋闔仲卿吳嶽廟碑惟沂隴之極南有山曰吳嶽五峯削成屏列環異雲

霞韜映秀氣中出且咸秦奧邑西望益都羣阜交立形勢多殊意混元融結之意於茲而拔乎其萃也其下東設巖

祠古今常享冥符幽贊誠非溢語而又尊嶽之號顯諸方志故略而不述在昔李唐天寶中封成德公清泰二年備

冊命昇靈應王至今文簡存焉泊乎聖朝每歲立秋降服次方嶽之禮以三獻祭之仲卿景德四年冬罷太華守奉

詔復理於是邦來年秋躬詣廟宇躡階之際四顧蕭然堂殿傾摧風雨不蔽况人寰之內綽有嘉名水旱之患民所

翳賴何斯陋矣豈不欽哉歷代相承但因循而已興替之道諒偶時焉仲卿敢不潛啓精誠觀縷事狀奏發聞上尋乃允俞衆選攝州司馬范秀兼廟令以專掌之及諸工雲集月無虛日鑿山就平累土成室惟新制度經營倍力數邑供用餘襍方畢自大殿周于廊廡等別創一百五十三間無大無小以丹以牒飛甍架空窗牖如織至於奇花異草之栽珍禽怪石之類率非舊物亦自遠而致蓋規模於金天氏之下館耶而後瞻仰之徒俱駭心目聰明之貴不染風埃儼如在之容助鴻鈞之化重樓向日與金碧以兼高綵帳凝烟對風光而永固足使清風凜然徽音不墜雖陵谷亦云變勒貞珉之可觀仲卿遂操觚染翰恭而書之庶知來者表一時之事耳 謹案唐有吳嶽祠堂記于公異文冷朝陽行書興元二年十月立元有祀西鎮碑梁□□文正書無姓名大德十一年五月立又一碑莫勝文賈

幹魯思台正書
延祐四年立

唐段太尉祠一在沂陽縣南一里一在縣西北四十里祀

唐段秀實唐書本傳興元元年詔贈太尉諡忠烈帝還都

又詔致祭旌其門閭親銘其碑太和中子伯倫始立廟有

詔給鹵簿賜度支綾絹五百以少牢致祭

唐德宗贈太尉段秀實紀功碑

立人之道曰君與臣爲臣之義曰忠與節忠莫極于衛國節莫大于忘身存其誠德貫乎天地致其功用施于社稷獨斷勦兇慝之命沉謀安宇宙之危其智勇足以極時其義烈足以宏教非昊穹錫慶敷祐皇家重振紀綱再激汗俗何邁屯之會而獲見斯人開府儀同三司檢校禮部尚書兼司農卿上柱國張掖郡王段氏名秀實字成功應期降生扶翼唐祚稟陰陽之粹氣備剛柔之全德體正明道從時卷舒蓄爲淳和發爲功烈朕宅帝位之五載孟冬十月賊臣朱泚反天悖人因時多虞乘我無備誘聚叛卒作亂於京師朕深惟罪己之誠遠遵避狄之義駕自中禁狩於近坰賊陰謀爲奸陽言示順以公嘗任涇帥素得士心採諸衆將引以自助公感時悲憤思定大業謂復國安人由已不可以顧私謂開物變化在權不可以虛死略匹夫之褊介蘊曠代之宏規內貞其心外混其跡且控察元惡情狀將因而圖之賊果不疑委以心腹遽發凶黨謀襲我師公詭說以詞止之不可乃竊取官印假爲兵符急追寇

軍不遠而復銷禍紆難陰陽若神於時物情危疑忠邪莫辨卒乘未輯軍旅未完微公之謀吾幾蔑濟旣而密結勇敢誓殲寇讐決策剋期中外發應會賊泚召公計事引入閣中露其奸情言其僭竊公氣填胸臆植髮衝冠仰天大呼帝鑒何昧孰爲臣子而忍是心語未絕音奮笏前擊凶徒敗面旣躓而奔左右駭然初未敢動繼者不至事遂無成逆徒交鋒因而遇害嗟呼天生萬物惟人最靈稟元氣之精鍾五行之秀是宜守正居順移孝資忠君君臣臣父子子各履於達道同臻於太和天乎不融生彼狂悖神乎不惠喪我忠貞靜言思之輟饋忘寐詳求其理抑有以焉茲朕不明敗德招損故列聖垂祐儆戒于予則泚之亂所以懲旣往勗將來禮教陵夷風訛俗弊故上帝降鑒聳動於人則殺公之死所以勵當今傳不朽也訪彼前史稽諸昔賢全大節者不必成功建大功者或未立節非節不可以裨教非功不可以持危義實相須事難並備吉甫以文武翼周室宣王中興絳侯以智謀安劉氏文皇紹立茂功著矣而節未可稱董卓協國以擅威伍孚制之而不畏王敦擁衆以稱亂周顛折之而無疑奇節偉矣而功竟不就至若屈伸合變進退知幾智以遂其謀勇以決其死功與時並節與名偕依古以還無公儔比貞烈之至通於神

明桀驚聞之而動心仇讐感之而不怨死於義而義著忘其家而家全行路興悲懦夫增氣矧子之惟其可弭忘且人之所重者身也國之所重者位也公能殺身殉國朕得不以重位報之哉乃詔有司冊贈太尉諡曰忠烈賜實封五百戶莊宅各一所嗣子授三品正員官諸子各授五品正員官表其閭里護其喪葬官立祠宇史載忠勳哀榮之典備矣君臣之義極矣公始以天寶四載奮筆從戎才爲時生官由才達得司馬戰陣之法參將軍帷幄之籌累典方州更踐臺寺出擁旄節入爲卿士歷位十七歲踰三紀封王列於異姓開府比於台司參職六官食賦百室言不伐善慮常下人恆持順信之規罔居疑悔之地利刃在手投節皆虛貞松有心老而彌勁吞大慙於方寸之內安危疑於晷刻之間力可屈而志不可遷身可殺而節不可奪所爲有始有卒爲臣之極致者與日月有期宅兆云畢身歿功在凜然如山勒名傳芳終古不滅以志吾過且旌善人銘曰浩浩上天四序唯均氣或埋鬱過爲災氛否不可終必復元亨洗以膏雨播之祥雲濟濟蒸人五常是則時或屯難乃生凶慝亂必有定允歸皇極拯以茂勳輔之明德勳德克崇茲惟段公實天降靈寧保朕躬日月蔽虧宇宙昏蒙罔然明誠獨誓深忠豺狼爲羣折折逞惡咆哮奔

突乘我未備公飛尺符橫制醜類變化若神邦家不墜元惡大憝誘奸作狂竊器僭名反易天常公獨挺身奮擊暴強烈烈英武歿而彌彰義振名教功存社稷贈極上台賞延真食省咎祇異懷賢憫惻刻銘豐碑昭示萬國

太白山神廟在郿縣東南四十里太白山上水經注山上

有太白祠民所祀也

謹案言民所祀是秦漢以來未入祀典也

冊府元龜天寶

八載太白山人李渾稱於金星洞仙人見語老君云有玉

版石記符聖上長生久視令御史中丞王鎮求而得之閏

六月丙辰詔太白山可封爲神應公其金星洞改爲嘉祥

洞仍一洞置一祠宇仙人臺下置一觀以真符玉芝爲名

唐會要天寶十四年封山神爲靈應公東坡志林太白山

神至靈自昔禱無不應近歲向傳公少師爲守奏封山神

為濟民侯自此禱不應太守乞復公爵詔封明應公且修

其廟祀之是嘉祐七年也通志熙寧八年進封福應王明

正統四年重修廟宋蘇軾乞封太白山神狀伏見當府郿縣太白山雄鎮一方載在祀典案唐天

寶八年詔封山神為神應公迨至皇朝始改封侯而加以

惠民之號府界自去歲九月不雨徂冬及春農民拱手以

待饑饉粒食將絕盜賊且興臣採之道途得於父老咸謂

此山舊為湫水試加禱請必獲響應遂令擇日齋戒差官

蒞取臣與百姓數千人待於郊外風色慘變從東南來隆

隆獵獵若有驅道既至之日陰風凜然油雲蔚興始如車

蓋既日不散遂彌四方化為大雨罔不周飭破驕陽于鼎

盛起二麥于垂枯鬼神甚幽報答甚飭竊以為功效甚大

封爵未充使其昔公而今侯是謂自我而左降揆以人意

殊為不安且此山崇高足亞五嶽若賜公爵尚虛王稱校

其有功實未為過伏乞更下所司詳酌可否特賜指揮范

純仁祭太白湫文比歲不雨被邊之民流離孳亡所不忍

視今夏驕亢復甚焦灼涓禱羣望曾莫我助是用遠邀靈

液以祈濡澤神既戾止遽獲嘉應早稼復蘇優渥沾足皆

關中勝卷十八十四關中叢書

神所賜敢不竭誠敢不腆禮以謝神貺惟聰明正直尚終沛施以庶乎有秋也尚饗蘇軾太白山祈雨文惟西方挺特英偉之氣結而爲此山惟山之陰威潤澤之氣聚而爲湫潭餅罌罐勺可以雨天下而况於一方乎乃者自冬徂春雨雪不至西方之所恃以爲生者麥禾而已今旬不雨卽爲凶歲民食不繼盜賊且起豈惟守土之臣所任以爲憂亦非神之所當安坐而熟視也聖天子在上凡所以懷柔之禮莫不備至下至於愚夫小民奔走畏事者亦豈有他哉凡皆以爲今日也神其盍亦鑒之上以無負聖天子之意下以無失愚夫小民之望又告封太白山明應公祝文天作山川以鎮四方俾食於民以雨以暘惟公聰明能率其職民以旱告應不逾夕帝謂守臣予加乃功惟新爵號往耀其躬在唐天寶亦賜今爵時惟術士探符採藥謂爲公榮實爲公差中原顛覆神不顧救今皇神聖惟民是憂民旣飽溢曾無禱求袞衣煌煌赤烏繡裳捨舊卽新以佑我民謹案廟有元修廟碑記延祐元年立李昶文文禮愷正書

臣謹案太白山上有靈湫數處歷代以來頗著神異關

中每逢望澤之時凡有祈禱悉昭丕應乾隆五年川陝
督臣尹繼善奏請列入本省祀典臣仰膺簡命巡撫陝
西三十九年三月春雨愆期麥田需膏甚急臣虔率寮
屬步禱神祠復遣官恭赴靈湫取水雨隨水至大沛甘
霖達旦連霄四野霑足臣專摺奏請特加昭靈普潤四
字封號並御製詩章敬鑄翠琰用答神庥至山中暨西
安省城西郭之外舊有神宇規制庳隘臣復捐俸鳩工
鼎新廟貌歲時報祭庶明神鑒格益賴嘉庥俾我西土
蒸黎咸蒙福祐焉

靈義侯祠在隴州城內通志唐大歷二年故郡累艱於得

水荀氏夫婦獻地因遷城於此敕封為靈義侯靈順夫人立祠以祀有禱屢應宋太祖時改封安祐侯

開元寺在鳳翔縣城內聞見後錄大殿九間後壁吳道子畫自佛始生修行說法至滅度山林宮室人物禽獸數千

萬種極古今天下之妙其識開元三十年云宋蘇軾記所見開元寺吳

道子畫佛滅度以答子由詩西方真人誰所見衣被七寶從雙後當時修道頗辛苦柏生兩肘鳥巢肩初如濛濛隱

山玉漸如濯濯出水蓮道成一旦就空滅奔會四海悲人天翔禽哀響動林谷獸鬼躑躅淚迸泉龐眉深目彼誰子

遶床彈指性自圓隱如寒月墮清晝空有孤光留故躔春遊古寺拂塵壁遺象久此霾香烟畫師不復寫名姓皆云

道子口所傳從橫固已蔑孫鄧有如巨鱗吞小鮮來詩所誇孰與此安得攜挂其旁觀謹案寺有唐開元十六年

楊淡所立尊勝經石幢

天柱寺在鳳翔縣北三里通志舊有楊惠之塑維摩像李唐

洞宿天柱寺詩天柱暮相逢吟思天柱峯墨研青露月茶
吸白雲鐘臥語身粘蘇行禪頂拂松探元爲一决明日去
臨邛宋蘇軾維摩像唐楊惠之塑在天柱寺詩昔者子輿
病且死其友子祀往問之跣躡鑿井自歎息造物安將以
我爲今觀古塑維摩像病骨磊嵬如枯龜乃知至人外生
死此身變化浮雲隨世人豈不碩且好身雖未病心已疲
此叟神完中有恃談笑可却千熊羆當其在時或問法俯
首無言心自知至今遺像兀不語與昔未死無增虧田翁
俚婦那肯顧時有野鼠銜其髭見
之使人每自失誰能與詰無言師

普門寺在鳳翔縣東一里通志唐建金大定六年明正德

八年重修舊有唐王維吳道子畫宋蘇軾王維吳道子畫
何處王維畫普門與開

元開元有東塔維摩留手痕吾觀畫品中莫如二子尊道
子實雄放浩如海波翻當其下手風雨快筆所未到氣已
吞亭亭雙林間彩暈扶桑暎中有至人談寂滅悟者悲涕
迷者手自捫蠻君鬼伯千萬萬相排競進頭如鼉摩詰本

詩老佩芷襲芳蓀今觀此壁畫亦若其詩清且敦祇園弟子盡鶴骨心如死灰不復溫門前兩叢竹雪節貫霜根交柯亂葉動無數一一皆可尋其源吳生雖妙絕猶以畫工論摩詰得之於象外有如仙翻謝籠樊吾觀二子皆神俊又于維也斂衽無間言又九日獨遊普門寺有懷子由詩花開酒美曷不醉來看南山冷翠微憶弟淚如雲不散望鄉心與雁南飛明年縱健人應老昨日追歡意已違不向秋風強吹帽秦人不笑楚人譏

耆闍寺在岐山縣東北四十里崛山下通志唐乾寧二年建石磴崎嶇巖洞峭絕春時人多遊此

法門寺在扶風縣北二十里崇正鎮聞見後錄寺有古塔四層瘞佛手指骨一節唐憲宗盛儀衛迎入禁中塔下層有芙渠工製精妙每芙渠一葉上刻一施金錢人姓名殆數千人宮女名爲多又刻白玉石像瘞佛指骨節置金蓮

花中隔琉璃水晶匣可見通志寺即唐憲宗迎佛骨處元

和十四年詔改為法門寺勅學士張仲素撰碑宋徽宗有

讚并大書皇帝佛國四字於山門之上謹案寺有千佛像碑一鋪製作精巧

惜無年月其陰及側刻涅槃盤經凡日月字並作疑是武后時物又有大聖真身塔碑銘大歷十三年四月立張

或撰文楊播正書又有秦王重修寺塔記天祐十九年二月立薛昌序撰文王仁恭正書困學紀聞曰舊史德宗紀

貞元六年岐州無憂王寺有佛指骨寸餘先是取來禁中供養二月詔送還本寺此迎佛骨之事也韓愈傳云鳳翔

法門寺有護國真身塔內有釋迦文佛指骨一節寺名與前不同攷法門寺即無憂王寺記載非一寺故互異耳應

麟之說非是天祐十九年乃梁主瑱之龍德二年碑為李茂貞所立故仍稱唐之號耳

西明寺在郿縣西南二十里唐顯慶三年為元奘法師建

西陽雜俎孫思邈隱終南石室與宣律師互參元旨於此

龍泉寺在汧陽縣東十五里龍泉山上一統志唐武德間

建宋大中祥符三年改普濟禪院謹案寺有宋普濟禪院碑記閻仲卿文沙門善

雋習王羲之書

慈禪寺在麟遊縣東四里一統志在杜澄二水交會處有

永徽四年鑄刻石佛像

天臺寺在麟遊縣西五里通志即唐九成宮故址南面青

蓮北負排雲寺內尚存白松古柏

宋張橫渠祠在郿縣東五十里大振谷口通志本朝康熙

二十三年賜額曰學達性天宋張舜民追贈張載疏臣伏視鳳翔府橫渠鎮居住故崇

文院校書張載學際天人誠動金石義之所在白刃可蹈心有不厭萬鍾何加口如不能言體若不勝衣議論感激

凜如秋霜雖萬軍之將不足言其勇也平居與人言退然若不知讀書者坐而講貫剖判是非談辨如流雖滔滔江漢不足方其廣也著書萬言名爲正蒙陰陽變化之端仁義道德之理死生性命之分治亂國家之經罔不究通方之前人其孟軻揚雄之流乎如荀况輩不足望于載也關中學者靡然就之謂之橫渠先生一登其門言行皆知孝悌仁義有若夙成雖去載千里之遠十年之久不敢一蹈非義常如載之臨其前後左右也自此西土學者洒然知先聖賢之學乃知鄉者誦說之富組綉之文特小道爾在熙寧中累荐朝廷召至闕下授以崇文院校書未幾以疾辭歸熙寧末年再至闕下神宗方將任用使行其所言其疾再作謁告西歸死于道路當時議者以謂載身逢明天子緣飾禮文修明治具之時再至朝廷竟不能伸其一言以終此載之短薄則不幸也有士如此當年不能興舉舉于老疾垂死之時治國者亦不得無慊然于心也載之死于今十有五年中外臣僚猶錄其平生以言于朝廷略以十數或乞賜田或錄其子或乞降諡然天聽高邈未蒙響答今載止有一妻一子衣食不足寄於親友日來月往人情憤煩飢寒之憂其勢甚迫若不上告朝廷何以赴愬且君子年日修身謹行固不爲其身之與子孫也朝廷褒賢

錄善豈特為其賢者之後乎如孟軻荀卿揚雄於今千有餘年學者徒能讀誦其書而已至於禮貌寂寥孰宜未括本朝一日列之封爵血食廟堂使後世觀之賢于孟軻荀卿揚雄乎賢于本朝乎故臣今日之言非為載也伏乞朝廷檢會累次臣僚奏陳于錄子賜田追諡三者之間凡可以厚載者舉一而足庶使褒賢之典獨見于本朝為善之風不墜於今日謹案祠有元延祐七年碑文禮愷文榻粹正書

真興寺在鳳翔縣城內一統志宋初節度使王彥超建閣

高十餘丈宋蘇軾真興寺閣詩山川與城郭漠漠同一形市人與鴉鵲浩浩同一聲此閣幾何高何人之

所營側身送落日引手攀飛星當年王中令斫木南山傾寫真留閣下鐵面眼有稜身長八九尺與閣兩崢嶸古人

雖暴恣作事令世驚登者尚吁喘作者何以勝曷不觀此閣其人勇且英又真興寺閣禱雨詩太守親從千騎禱神

翁遠借一杯清雲陰黯黯將嘘遍雨意昏昏欲釀成已覺微風吹袂冷不堪殘日傍山明今年秋熟君知否應向江

南飽食粳

鐵佛寺在隴州香泉通志寺有鐵佛一軀宋咸平中建元祐間重修

金惠濟禪院在郿縣槐芽鎮北一里金大定七年牒本寺自來別無名額今納訖合著錢一百五十貫乞立惠濟名

額因賜名惠濟禪院

謹案此牒刻石見存金世賣僧道尼女冠度牒寺觀音額之例乃大定五

年所罷此牒乃四年所給刻於七年者也

玉清宮在汧陽縣西舊縣東三里一統志大定中建元至元中重修姚燧撰碑

元馬超祠在扶風縣續文獻通考元順帝至元六年詔建馬超祠於扶風茂陵山下

大金佛寺在鳳翔縣東通志大德元年勅修世祖鑄金佛像高尺許重三十五斤賜寺中供養明初失之

成道宮在寶鷄縣東南六十里渭水之南通志邱處機修道於此始名長春觀後改今名

明三賢祠在汧陽縣東通志祀燕伋郭欽段秀實伋從夫子適周欽肥遯於王莽之世秀實死難舊各祀於鄉天啓元年始創此祠

古蹟 郊邑

鳳翔府上古鴻冢在鳳翔縣境史記五帝本紀注鬼臾區號大鴻黃帝大臣也死葬雍故鴻冢是封禪書注黃帝臣

大鴻葬雍鴻冢蓋因大鴻葬為名也路史疏仡紀帝鴻氏

葬雍雍之鴻冢是矣在秦漢皆列祀謹案鴻冢自古皆云大鴻獨羅泌以為帝

鴻蓋

唐虞釐亭在郿縣境漢書郊祀志注后稷封釐讀如郿或

曰鳳翔府郿縣有郿亭桓譚新論郿在漆縣其民有會日

以相與夜中市如不為則有災咎謹案說文有美陽亭云民俗以夜市有豳山者

即此後漢書王恠傳稱恠除郿縣令到官至釐亭者亦是

周授經臺在鳳翔縣南雍勝略本終南山峯尹喜既見老

子授五千言尹喜退而書之曰道德經後常居此

野人塢在鳳翔縣南山記秦穆公失善馬野人得而食

之者三百人吏捕得欲法之公曰吾聞食善馬肉不飲酒
傷人皆賜之酒其後秦伐晉三百人皆從報德遂脫穆公
於難

鳳臺在鳳翔縣南十五里水經注雍有鳳臺秦穆公時有
簫史者善吹簫能致白鶴孔雀穆公女弄玉好之公爲作
鳳臺以居之積數十年一旦隨鳳去雍宮世有簫管之聲
焉今臺傾祠毀不復然矣

召亭在岐山縣西八里召公村詩譜文王分岐邦周召之
地爲周公旦召公奭之采地水經注雍水東經召亭南召
康公之采邑也

周城在岐山縣西北十五里亦曰周公邸續漢書郡國志
美陽縣有周城水注經岐水之南有周城周城者周公之
采邑也

太王陵在岐山縣東北五十里通志在岐陽鎮北俗云幽
王陵案幽王陵在臨潼北二十五里太王始遷岐下冢在
岐陽無疑

白起城在郿縣東北十五里雍勝略秦白起所築

秦穆公墓在鳳翔縣城內東南隅史記秦本紀穆公卒葬
雍皇覽秦穆公冢在橐泉祈年宮觀下通志墓周圍五丈

有奇前有碑歲時致祭

宋蘇軾秦穆公墓詩橐泉在城東墓在城中無百步乃知昔未有此

城秦人以泉識公墓昔秦穆不誅孟明豈有死之日而忍用其良乃知三子殉公意亦如齊之二子從田橫古人感一飯尚能殺其身今人不復見此等乃以可見疑古人古

人不可望今人益可傷
謹案史記注謂在雍縣東南二里是在城以外也今城正唐末李茂貞所築

三良冢在府城南半里史記秦本紀注應劭云秦穆公與

羣臣飲酒酣公曰生共此樂死共此哀於是奄息仲行鍼

虎許諾及公薨皆從死括地志三良冢在岐州雍縣口一

里故城內

唐劉禹錫三良冢賦並序魯文公六年秦伯任好卒以子車氏之三子奄息仲行鍼虎為殉皆

秦之良也國人哀之為之賦黃鳥君子曰秦穆公之不為盟主也宜哉先王違世猶貽之法而况奪之善人乎是以

知秦之不復東征也秋季月吾西游汧渭出于岐雍之間於古道旁得三良冢心甚哀之涕泗者久之而去詞曰昨

宿岐城曉涉渭東霜凌雪結飛沙亂蓬中野躊躇屈此古墟野人曰即車氏之冢方驅駕班如久而咤曰吾嘗讀舊

史矣古者秦氏大於穆公出師則寧東夏用賢則霸西戎
大邦服其禮小邦畏其雄謀已集戰亦武不能勤王不爲
盟主者何居以滅天之良喪人之特百夫仰系一朝而踣
可哀也哉宛其三子遭時速遭主已卽世身皆靡全指冥
芒而爲期撫昭世而坐捐方惴惴以臨穴且哀哀而號天
從有言於寒原莽蕩千里迴眺無垠上刺衰德下傷幽魂
挂驂隴樹脫劍山門掇野芳以爲荐汲行潦而充罇矧今
情之猶悲諒古恨之潛吞死而不作吾誰與言代事浩茫
人壽爾天言念君子中心悄悄哀生人之長慟赴永夕之
莫曉歸去來兮不可留且悲吟于黃鳥魏曹植三良冢詩
功名不可爲忠義我所安秦穆先下世三人皆自殘生時
等榮樂旣歿同憂患誰云捐軀易殺身誠獨難攬涕登君
墓臨穴仰天嘆長夜何冥冥一往不復還黃鳥爲悲鳴哀
哉傷肺肝晉陶潛三良冢詩彈冠乘通津但懼時我遺服
勤盡歲月常恐滅愈微忠情謬獲露遂爲君所私出則陪
文輿入必侍丹帷箴規嚮已從記議初無虧一朝長逝後
願言同此歸厚恩固難忘君命安可違臨穴罔遲疑投義
志攸希荆棘籠高墳黃鳥聲正悲良人不可贖泫然沾我
衣謹案括地志冢在故城
內今在城外是城已改築也

秦武公墓在岐山縣西南史記秦本紀武公葬雍平陽

臣謹案陝西通志據劉紹周平陽封域辯以秦武公墓在郿縣攷武公葬平陽以平陽爲屬郿縣者魏書地形志史記裴駙集解是也以平陽爲屬岐山者括地志史記正義是也又攷元豐九域志虢縣有平陽鎮蓋卽平陽故城虢縣元時省入寶雞而一統志謂平陽城在岐山縣西南接寶雞界地理頗合則以武公墓在岐山爲有據今從之

秦寧公墓在寶雞縣西北史記秦本紀秦寧公葬西山括

地志寧公墓在陳倉縣西北三十七里秦陵山

謹案始皇本紀云云

葬地與此不同

漢伏波村在扶風縣西七里一統志馬援故居

郿塢城在郿縣東十五里水經注渭水東逕郿塢城南雍

勝略董卓封郿侯築塢高厚皆七丈徙金銀雜物于內積

三十年穀俗謂之小長安

宋蘇軾郿塢詩衣中甲厚行何懼塢裏金多退足憑畢竟英雄

誰得似臍脂自照不須燈

回中城在隴州西北四十里雍勝略卽漢來歙開道處

斜谷關在郿縣西南三十里通鑑元狩中發卒萬人作褒

斜道魏志郭淮傳青龍二年亮出斜谷田于蘭坑賈逵傳

正始元年曹爽征蜀使逵至斜谷觀形勢蜀志後主傳建

興十一年蜀運米集斜谷口治斜谷邸閣諸葛亮傳十二年亮由斜谷出據五丈原雍錄長安可達漢中惟子午關子午關在正南次西則駱谷關又西則斜谷關漢王自漢中出襲雍則自褒斜出也岐山縣志褒斜二谷阻衙嶺爲首尾雍梁有事爲出入咽喉與祁山大散子午駱谷並稱要地

大散關在寶雞縣南五十二里大散嶺上通褒斜後漢書順陽侯嘉傳建武二年延岑引兵北入散關至陳倉嘉追破之注散關故城在陳倉縣南十里有散谷水因取名焉水經注汧水東入散關唐書地理志寶雞縣西南有大散

關通典有汧水散關在寶雞縣南九域志寶雞縣有武城車舍大散三鎮中興四朝志大散關屬梁泉縣在寶雞南為秦蜀往來要道自關距和尚原纔咫尺兩山關控斗絕出可以攻入可以守實表裏之形勢也縣志一曰散關在大散嶺上為秦蜀襟喉南山自藍田而西至此方盡又西

則隴首特起汧渭滎流關當山川之會扼南北之交唐羅

散關詩過往長逢日色稀雪花如掌撲行衣嶺頭却望人來處特地身疑是鳥飛謹案水經注渭水東入散關抱

朴子神仙傳曰老子西至關關令尹喜候氣知真人西游遇老子為著道德二經即此地今俗有以為函谷者非

隴關在隴州西七十里隴山下後漢書順帝紀永和四年

命扶風築隴道塢五年羌寇武都燒隴關三秦記隴謂西

關其坂九回上者七日乃越晉書地道記漢置隴關西當
戎狄通典隴一名隴坻漢隴關今名大震關在縣西唐書
高祖本紀武德五年突厥陷大震關柳宗元館驛使記自
武西至於好時其驛二其蔽曰鳳翔府其關曰隴關雍錄
漢武帝至此遇震雷因名大震關太平寰宇記大震關後

周天和元年置今名隴山關謹案後周避諱改曰大寧亦曰隴山胡三省通

鑑注唐薛逵改築新關於隴山由是謂大震爲故關

馬援墓在扶風縣西七里後漢書本傳援卒後有上書譖
之者帝怒妻孥惶懼不欲以喪還舊塋裁買城西數畝地
藁葬而已妻子詣闕上書訴冤前後六上然後得葬

魯恭墓在扶風縣北四十里魯馬村謹案中牟縣志恭墓在縣西北兗州府志

載在焦氏山南攷後漢書本傳恭以老病罷官卒于家則中牟諸處皆非實冢

班固墓在扶風縣東二十里

三國三交城在寶雞縣西十六里元和郡縣志司馬懿與

諸葛亮相距所築

石鼻塞在寶雞縣東四十里通鑑唐光啓三年田令孜奉

上發寶雞增禁兵守石鼻為後拒胡三省注蘇軾曰寶雞

武成鎮即俗所謂石鼻塞也宋蘇軾石鼻城詩平時戰國今無在陌上征夫自不聞北

客初來試新險蜀人從此送殘山獨穿暗月朦朧裏愁度奔河蒼茫間漸入西南風景變道邊修竹水潺潺

隋文帝泰陵在扶風縣東南四十五里隋書后妃列傳文

獻獨孤皇后仁壽二年八月葬於泰陵文帝紀高祖文皇

帝仁壽四年十月合葬於泰陵同墳而異穴關中陵墓志

陵高五丈周數百步謹案元和郡縣志太平寰宇記皆云文帝泰陵在武功西南二十里三時

原一統志從之攷武功西南二十里已交扶風界陵在今扶風境故載于此

唐臨汧城在隴州西北册府元龜王承元為鳳翔節度使

於汧陽西北八十里築新城一所賜額為臨汧城鳳翔西

接涇原無山谷之險吐蕃往往由是入寇故承元奏於衝

要築壘分兵若干人以守之謹案汧城新舊唐書皆在汧陽一統志列入隴州蓋本鳳

翔府志

隴亭在隴州隴山官道通志唐時已有此亭

安戎關在隴州西南冊府元龜大中六年隴州防禦使薛
逵言汧源西境切在故關昔有隄防殊無制置僻在重岡
之上苟務高深今移要會之中實堪控扼舊絕泉井遠汲
河流今則臨水挾山當川限谷危牆深塹克揚營壘之勢
謹畫圖進乞改爲安戎關唐書地理志汧源西有安戎關
本大震關薛逵移築更名通鑑唐天復二年孔勅取成隴
二州乃自故關歸後唐乾祐元年蜀將韓保貞出新關胡
三省注秦州清水東五十里有大震關自薛逵徙築安戎
關於隴山由是謂大震關爲故關今隴山之西有故關山
新關在汧源縣西

潘氏堡在寶雞縣東北唐書楊晟傳光啓三年守大散關
朱玖攻關晟戰於潘氏遂敗通鑑注潘氏堡在寶雞東北
模壁塞在寶雞縣西南七十里通鑑乾祐初蜀將安思謙
救鳳翔遣別將趨模壁

箭括關在汧陽縣南十五里通鑑梁貞明六年蜀將陳彥
威出散關敗岐兵於箭括嶺胡三省注其山兩歧故呼爲
箭括有箭括關宋史吳玠傳紹興三十一年金沒立方攻
箭括關玠遣將擊敗之

甘露坊在麟遊縣西唐馬坊也九域志縣有八馬坊

李淳風墓在岐山縣東北五里

謹案河南府志李淳風墓
在新安縣畿輔通志在涿

州皆無所徵信考唐書淳風岐山人似應以此為正又西安府志蓋屋縣東二里亦有淳風墓

楊恂墓在扶風縣東北二十里通志在舊美陽城北二里

謹案墓上有碑額題恆農先賢積慶之碑入字蓋即楊國忠父也唐書宰相世系表以為楊友之子與碑云列考志謙者異碑天寶十二載八月立明皇撰並分書太子亨題額

李茂貞墓在寶雞縣北五里

虢國夫人墓在寶雞縣東唐書后妃傳馬嵬之難虢國與國忠之妻裴柔等奔陳倉縣令率吏追之乃自剄死瘞陳

倉東郭外

段行琛墓在汧陽縣北七十里謹案墓有神道碑張增正書李同素篆額無撰人姓名

大歷十四年閏五月立考趙明誠金石錄又有一碑為楊炎撰文蕭正正書乃大歷四年立者非此碑今此碑存

而楊炎文碑蔑如矣

段秀實墓在汧陽縣西六十里太平寰宇記在縣西北四

十里萬善鄉草僻川西謹案臨潼縣亦有秀實墓

宋凌虛臺在鳳翔縣東北一統志陳希亮守鳳翔時所建

宋蘇軾凌虛臺記臺于南山之下宜若起居飲食與山接也四方之山莫高于終南而都邑近於山者莫近于扶風以至近求至高其勢必得而太守之居未嘗知有山焉雖非事之所以損益而物理有不當然者此凌虛之所為築也方其未築也太守陳公杖履逍遙于其下見山之出于林木之上者纍壘如人之旅行于牆外而見其髻也曰是必有異使工鑿其前為方池以其上築臺出于屋之簷而止然後人之至於其上者恍然不知臺之高而以為山之踴躍奮迅而出也公曰是宜名凌虛以告其從事蘇軾而求文以為記軾復于公曰物之興廢成毀不可得而知也昔者荒草野田霜露之所蒙翳狐虺之所竄伏方是時豈有知凌虛臺耶廢興成毀相尋於無窮則臺之復為荒草

野田皆不可知也嘗試與公登臺而望其東則秦穆之祈年臺泉也其南則漢武之長楊五柞而其北則隋之仁壽唐之九成也計其一時之盛宏傑詭麗堅固而不可動者豈特百倍於臺而已哉然而數世之後欲求其彷彿而破瓦頽垣無復存者既已化爲禾黍荆棘邱墟壠畝矣而况於此臺歟夫臺猶不足恃以長久而况於人事之得喪忽往而忽來者歟而或者欲以夸世而自足則過矣蓋世有足恃者而不在乎臺之存亡也既已言於公而退而爲之記又凌虛臺詩才高多感激道直無任還不如此臺上舉酒邀青山青山雖云遠似亦識公顏崩騰赴幽賞披豁露天慳落日銜翠壁暮雲點烟鬟浩歌清興發放意未禮刪是時歲云暮微雪洒袍斑吏退迹如掃賓來勇躋攀臺前飛雁過臺上雕弓彎聯翩向空墜一笑驚塵寰

橋頭寨在鳳翔縣東北十五里通鑑紹興三十一年吳璘遣別將彭青至寶雞渭河夜劫金人橋頭寨破之

張載墓在郿縣東五十里橫渠鎮呂與叔行狀熙寧十年

十二月乙亥行次臨潼卒門人送其柩歸於家元豐元年八月葬父涪州墓之祔穴

金橫水鎮在鳳翔縣東三十里金史地理志鳳翔府舊有橫水鎮

益店鎮在岐山縣東三十五里金史地理志鳳翔府舊有驛店鎮

馬蹟鎮在岐山縣東南三十五里金史地理志岐山縣有馬蹟鎮謹案今名羅局鎮

元射箭臺在寶雞縣西南十里一統志元憲宗入蜀常駐師於此較射

清風臺在寶雞縣南六十里一統志邱處機所築西倚飛雲壁東臨漱玉溪爲一邑最處

二里關在寶雞縣西南四十里元史鄭鼎傳中統初鼎從伐蜀攻二里散關屢立戰功縣志關居高嶺上長亘二里因名乃連雲棧出入必由之路明初設巡檢司於益門鎮嘉靖間遷於此

益門鎮在寶雞縣西南十五里通志元末李思齊所築以備川蜀洪武三年蜀將王友仁攻興元守將金興旺請援時徐達在西安卽帥師還屯益門鎮縣志陝西旣入關平衍行千餘里西南抵寶雞復岸然山合惟一隘口始入是

爲益門鎮秦山嵯峨清江滉瀆路惟鳥道雲棧百折達荆
梁通滇益名鎮以益義取諸此

李思齊墓在寶雞縣東三十里

明咸宜關在隴州西四十里通志明正統中因關山路阻
改咸宜關移巡檢司於此鑿山開道通秦鳳故關廢爲鎮
臣謹案隴山置關始於西漢自漢迄明雖經三徙然咸
因山設險總而名之皆隴關也漢曰大震唐曰安戎明
曰咸宜考太平寰宇記安戎宋時已廢後此仍由大震
卽今隴州西八十里之關山是也前明咸宜置關而大
震又廢唐宋以大震爲故關而安戎爲新關近時則以

關山爲故關而咸宜爲新關雍勝略云左隴山而右汧
水面五峯而扼靈谷爲秦鳳要害之地信哉

本朝大學士黨崇雅墓在寶雞縣西平原通志康熙八年
葬衛周祚爲其志銘

關中勝蹟圖志卷十八終